

PABOJA ETEHUE CONITO CUIÑAJIJO BA'E YASIJJE BECANEJJIIPEA'AI 2 CORINTIOS

Pabohua tecue ca o'oyanaje Jesosaja epeejji cuana Conitojo ba'e yasijje

¹ Eya Pabo, Jesosa Quitoja huoojea'yo oja sohui huohuijji. Jamaya Eyacuiñajjiya a sa acani. Timoteo esejaya epeejji enijje nequi. Eyaya tehueaña miquiana huasijje. E'e, miquiana Jesosaja epeejji cuana Conito cuiñajjiyo ba'e yasijje, ma Acaya meshijo ba'e yasijje cuanaya tehueaña eyaya.

² ¡Esejaya Emeshi Mese neiya Jesosa Quitohua, Eyacuiñajjiya, esejaya Chii neiya pea'ai miquianaya cajaahuana neinei cahua; quea bei caba'e mee cahua pea'ai!

Pabo Eyacuiñajji nijke mimiani quea bihui

³ ¡Eyacuiñajji ejjabihuiaqui! E'e, oya esejaya Emeshi Mese nei Jesosa Quitoja Chii, esejaya Chii nei pea'ai poani. Oya esejo jjashahuabaquiani quea bei. Ohuaya eseya quea bihui nee po mee cani pea'ai.

⁴ Eseyá quea nee, quea yeno poanijo, ohuaya quea bihui nee po mee cani. Quea bihui nee po majje eseyaya pea cuana quea bihui nee po meeje'yo, yeno'ama pea'ai. Jamaya ejja'aqui ba'a: —Eyacuiñajjiya ecuana jaahuana cani. Oya

miquiana jaahuanajji poani pea'ai. Jamajjeya ja'a quea yeno pojji!

⁵ Jesosa Quito quea nee poanaje dejja mimishi cuaa napa cajje. Eseyal onijje jjapeequianijo, pea cuaa eseya napa caje pea'ai. Jamatii, eseya quea bihui nee po mee caje Jesosaa. Majoya eseyaya pea cuana quea bihui nee po meesahuaje Jesosa nijje.

⁶ E'e eyaya, Timoteohua pea'ai esohui huohuiaña Jesosajo. Jamajjeya pea cuaa ecuana napa cani. Jamatii, ecuanaja esohui shajja'ajja majje miquianaya Jesosa nijje jjapeequi'yani. Ohuaya miquianaja mimishi cuana cuijea cal'yonaje. Jamajjeya miquianaya quea bei nee poani. E'e, Jesosaa ojaya epeejji quea ca'a nee po mee canijo, miquianaya quea ca'a nee poaje pea'ai. Jamajjeya pea cuaa miquiana napa cajje Jesosaja epeejji quea ca'a nee poaje tii. Onijje jjapee tiitiiquije'yo pea'ai. E'e, Jesosaa miquianaya ojaya epeejji quea ja'a po mee caje'yo ecuana jayojjaya, quea bei.

⁷ Jiquio ecuanajaya eba ba'a: Miquianaya Jesosaja epeejji quea ja'a po tiitiije'yo. E'e, miquianaya ecuana jayojja poaje. Jesosa nijje jjapeequianijo, pea cuaa napa caje. Jamatii Jesosaa miquianaya quea bei nee po mee caje ecuana jayojjaya. Jamaya Jesosaa acaje'yo miquianajo, ecuanajo pea'ai.

⁸ Epeejji cuana, jjeya ecuaaya huohuije quea nee ecuana poanaje Asia meshijo nequi miquianajaya ebajji. Jomajo ecuana ba'enaje quea camaja nee nee, quea mano poanaje. E'e, ecuana jjashahuabaquinaje jama ba'a: —E'e, ecuanaja quea camaja nee nee Jesosa

nijje ejjapeequijji, jiquio meshijo pojja'a mo manoje'yo.

⁹ E'e, mimishi cuana jjashahuabaquiani ecuana quecuajji.

Eyacuiñajjiya ecuana ba mee canaje jama ba'a: Dejja cuanaja ecuana ejaahuanajji pojjeama. Oya oe nei ecuana jaahuanajji poani. Ohuaya ohuaye nei emano'yojaa cuana shequi mee ca o'oyani. Jamaya eseya ba mee canaje Eyacuiñajjiya.

¹⁰ E'e, mimishi cuaa napa huicha'a huicha'a cajje, ecuana quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuana jaahuana ca'yonaje; mano'yo jjima Asia meshijo nequi. Ecuana jjashahuaba tiitiquiani jama ba'a: —Eyacuiñajjiya ohuaye neiya ecuana jaahuana tiitii canijo, mano'yo jjima jjeya.

¹¹ E'e, miquianaya Eyacuiñajji nijje miminaje ecuana ojaya ejaahuana tiitijji. Jamajjeya ohuaya miquianaya shajja'ajja canaje onijje mimiani. Ecuana jaahuana canaje. Jamajjeya quea huiso Jesosaja epeejji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epeejji jaahuanaña quea ja'a nee.

Pabo Conito huasijke poqui jjima poaje

¹² Ecuanaaja eba'ejjijo, echacojjijo, ehuohuijjijo pea'ai ecuanaaya quea bihui nee huohuiaña. E'e, miquiana nijje, oijaña pea cuana nijje nequina-jejo pea'ai e'e jojo nei ecuanaaja echaco quea pame nee poanaje. Eyacuiñajjiya ecuana chaco meesahua canaje ojo quea pame nee. Ecuanaaja ejjashahuabaquijji quea ja'a nee pea'ai. Dejja cuanaja ejjashahuabaqui'yojji jayojja jama ba'e ajja.

Chojja, de. Eyacuiñajjiya ecuana ba'e meesahua cani ojaya esohui jayojja.

¹³ Ecuana ja esohui etehue'yo miquiana huasijje quea ja'a nee. Esohui quea quehua tehue jjima. Eya jjashahuabaquiani jama ba'a:

¹⁴ Yahuajo miquianaaya ecuana ba pishana majje ejjaba'e bamequi'yoiji banaje. Quijje quea ja'a nee baje'yo ecuana ba neinei majje. Jamajjeya Jesosa, Emeshi Mese nei poe o'oyajo, ecuaaya oya huohuije'yo miquiana ojaya epeeiji quea tame poanaje. Cuanaya ojaya esohui jayojja ba'yani, miquianaaya quea bihui nee ecuanajo huohuije'yo Jesosa poe o'oyajo.

¹⁵ E'e, ecuea eba miquianaya jjabahuejjaquije eya esohui jayojja quea ja'a ba'yani. Jamajoya jjeyahua nei eya miquiana que poqui o'oya sa poanaje miquiana Jesosajo quea ja'a nee ba'e meesahua o'oyaa.

¹⁶ Yahuajo eya jjashahuabaquinaje jama ba'a: —Jesosaja epeeiji cuana Masenonia meshijo ba'e yasijje poquije eya dobiquinanaje Conito cuiñajji yasijje Jesosaja epeeiji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jjashahuabaquinaje.

¹⁷ Jamatii eya poqui jjima miquiana baa. Miquiana baquijji eya jjashahuabaquinaje quea ja'a nee. Ecuea epoquijjiyo eya jjashahuabaqui aija pea cuana jayojja jama. Jesosaja epeeiji pojjeama cuaa huohui cani jama ba'a: —Eya poquije. Chojja, eya poqui aija —jamaya eya jjashahuabaqui aija. Eyaya ecuea

ejjashahuabaquijji jayojja jama aje'yo.

¹⁸ Eyacuiñajji siajje po ajja, ojaya esohui jayojja jama ohuaya acani. Ojaya eba eya o jayojja e'e nei poani, siajje po ajja jama ba'a: —E'e pojja'a, de —jamaya eya siajje po ajja.

¹⁹ Eyaya Sinasi nijjeya, Timoteo nijjeya pea'ai Jesosa Quitojo huohuinaje miquiana huasijje. Oya Eyacuiñajji Bacua Ejja. Ojaya esohui jayojja jama acaje'yo e'e jojo nei, ohuaya.

²⁰ Eyacuiñajji esohui yahuajo quea huiso, quea pame nee nee. Jesosa Quito ese jaahuanaa poeyanaje. Ohuaya ojjaña Eyacuiñajji esohui yahuajo jayojjaya jama jjeya acaje'yo esejo. Jamajjeya Jesosa Quitohua Eyacuiñajji esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuana nijje. Ojjaña e'e jojo nei poani. Miya siajje po ajja nei nei —jama bihuameya seya aña.

²¹ Eyacuiñajjiya ecuana, miquianaya pea'ai ojaya epeeiji po mee canaje. Ohuaya eseya babaca ca'yonaje onijke ejjapeequijji.

²² Jama esejo acanaje ba'a: —Miquianaya ecuea epeeiji cuana poani. Ecuea ejjeshe jayojja jama miquianaya —Eyacuiñajji poanaje.

Eyacuiñajjiya ese que huoojea canaje Edojjoshahua Pame ese jaahuanajji. Edojjoshahua Pameya eseya ba mee cani jama ba'a: Quijje eseya quea ja'a nee Jesosa jayojja ba'e tiitiije'yo Eyacuiñajji nijje eyajo.

²³ Eyacuiñajjiya ba cani ecuea ejjashahuabaquijji miquianajo quea pame nee poani. Jama poani eya ba'a: —Conito huasijje jjeya epoquiya

jjemo eyaya onaya tecueajea'yome pojja'a, quea mimishi ba'yanijo.

²⁴ Eya miquianajaya emeshi mese pojjeama, miquiana huoojea neinei'yojji pojjeama. Eyaya ca ca esohui huohuaña, Jesosaja esohui, miquiana queabihui nee po meeiji. E'e, Jesosaja esohui jayojja jama añajo, ojaya epeejji quea ja'a nee poaje'yo miquianaya.

2

¹ Jjeya eya jama jjashahuabaquiani ba'a: — Jjeya Jesosaja epeejji Conitojo ba'e beca cuana quea mimishi poanijo, eya poqui ajja jocuama o tecueaa. Jjabahuejjaqui o'oyajo, quea yeno poaje o'oya oya cuana —eya poani.

² E'e, miquianaya eyaya quea yeno po mee majje, ¿ajeo acuae che eya quea bihui po'yome?

³ Jamajjeya yahuajo eyaya miquianaya tehuenaje quea tecue mimishi pajea mee'yojji. E'e, miquiana quea mimishi poanijo, eya quea yeno poanaje. Pea chama' e quea bihui nee po meeiji. Eya jjashahuabaquinaje miquianajo jama ba'a: —E'e jojo nei ohuaya Eyanguiñajija esohui jayojja jama acaje'yo. Majoya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

⁴ E'e, eyaya quea yeno nee esohui quea tecue tehuenaje miquiana jjabahuejjaqui mee'yojji. Quea camaja esohui quea tecue etehuejji. Miquianaya quea yeno po mee sa po'yo ajja. Chojja. Eya jjashahuabaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea

nee nee poani —eya poani. E'e, jamaya ecuea ejjashahuabaquijji miquianajo.

Jesosaja epeeiji quea mimishi tecuea majje ja'a quea tecue po tiitiiji onijje ohua mimishi pajea cajo!

⁵ Jesosaja epeeiji miquiana nijje nequi ca ca oe quea mimishi poanaje. Eya quea yeno nee poanaje ojo. Miquianaya quea yeno poanaje pea'ai ojo. Jamajjeya eyaya o jjabahuejja meequiviji tehuenaje oja mimishi cuana pajea mee'yojji.

⁶ Beshahua nei miquianaaya, ojjañaa oya jjabahuejjaqui meenaje ojaya mimishi epajea'yojji. Apoa.

⁷ Jamajjeya ja'a oya quea yeno po tiitii meeiji! ja'a oya tecuea tiitiiji! Chojja. Quea yeno nee nee po tiitii majje oya Jesosa nijje jjapeequi pajea'yo chana!. Jjabahuejjaqui'yajo, ionije jjapeequi'yocue quea pame nee!

⁸ E'e, oya jama huohuicue ba'a: —Miya ecuanaja quea boti nee, epeeiji —jamaya oya acue.

⁹ Yahuajo eyaya ma esohui tehuenaje miquiana ba'ajjajji so'o. Eya ba sa poanaje jama ba'a: —ja'a shajjama' poaje? ja'a ecuea esohui jayojja jama poaje? —poanaje.

Jamajjeya eyaya esohui tehuenaje miquiana huasijke ma dejja quea mimishi jjabahuejjaqui mee'yojji. Miquianaya ecuea esohui etehue'yo jayojja jama po'yonaje. Quea pame. Apoa poanaje.

¹⁰ Jamajjeya miquianaya ma dejja quea mimishi poani nijje quene'ama poajo, eya onijje quene'ama poaje'yo pea'ai. E'e, ecuea aje ojaya mimishi epajea'yo pea'ai. Eya Jesosa Quitoja

esohui huohuijji poanijo ma dejja mimishi nijje quea tecue poanaje. Jjeya ma dejja nijje tecue'ama poanaje. Jamajjeya ñmiquianaya pea'ai quea bei, quea ja'a pocue!

¹¹ Eseyá quea bei, quea ja'a poanijo, Edosiquiaa eseaya edasiajji pojjeama. E'e, esejaya eba Edosiquianaja ejjashahuubaquijji. Oya aje oe edasiajji poani, de, Jesosaja epeejji cuana quea mimishi po mee o'oya sa acani.

Jesosaja ehuohui eyacua

¹² Yahuajo pishana eya poquinaje Toasa cuiñajji yasijje esohui quea tame Jesosa Quitojo huohuiya. Jomajo esejaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee.

¹³ Jamatii ecuea epeejji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuubaquinaje. Jamajjeya eya Toasajo ba'e nijje miminaje jama ba'a: — Poquia iñia Tito sa'ajja.

Majoya eya poquinaje Masenonia meshi yasijje.

¹⁴ Eseyaya Eyacuiñajji bihuiaña. Ohuaya eseaya quea ja'a nee nequi mee cani. E'e, ohuaya eseaya dejja mimishi cuana mimicuajeanobiajea meesahua cani; eseaya Jesosa Quito nijje jjapeequi mee cani quea ja'a nee. Ohuaya ecuana huohui meesahua cani ojjaña meshijo Jesosa Quitoja esohui. Ma esohui quea tame nee nee. Jiquio ecua shiyeshiye esejaya quea boti nee aña jama jayojjaya Jesosaja esohui ecuanajaya quea boti nee.

¹⁵ E'e, Eyacuiñajjiya ecuana huoojea ca'yonaje Jesosa Quitojo huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeejji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitiije'yohua pea'ai ba caje'yo Ëyacuiñajji quea pame nee: —E'e Eyacuiñajji, miya quea pame nee nee. Pea chama' mi jayojja —oya bihuiaje eseyaya.

¹⁶ E'e, Jesosa Quitoja esohui shajja'ajja majje ojjaña mimishi cuana jjabaquije oya cuana ca-jaa'ya'yo, quea nee nee poaje'yo cuaquijo. Ma esohui shajja'ajja majje Jesosaja epeejji cuana ca ca jjabaquije oya cuana ba'e tiitiije'yo quea ja'a nee eyajo Eyacuiñajji nijje.

¹⁷ ¿Aya acuae maya esohui eyacua Jesosajo huohui caje pea cuana huasijke, de? Ma esohui quea pame Jesosa Quitojo ecuana huoojea majje sohuihuohui meesahua caje quea ja'a nee, ohuaya. Pea cuaa Eyacuiñajjiya esohui huohui cani bejjo sosejje. Ecuana, chojja. Ecuaaya, Jesosaja epeejji poaniya quea bihui nee huohuaña e'e jojo nei. Ecuana jama ba'a: E'e jojo nei Eyacuiñajjiya ecuana huoojea ca'yonaje ojaya esohui huohuiya.

3

Jesosa nijje chaco cani esohui eyacuajo

¹ E'e, Eyacuiñajjiya ecuana huoojea ca'yonaje miquiana huasijke ojaya esohui huohuiya. Pea cuaa miquiana que quia ca'yonaje esohui peaja tehue'yo jama ba'a: “jjiquio dejja Jesosaja epeejji e'e jojo nei! ¡Jamajjeya oya cuana shajja'ajjacue!”

Ecuana ja ca peaja tehue'yo equiajji pojjeama miquiana que jama ba'a: “¡Pabo quea pame nee; oya shajja'ajjacue!” Chojja. Ecuana miquianajaya eba Eyacuiñajjiya huoojea'yo.

² Ecuana jama jjashahuabaquiani ba'a: — Ojjaña ba cani ecuanajaya esohui shajja'ajja majje Jesosaja epeeiji quea pame nee poanaje miquianaya, Conitojo ba'e cuana.

Jamajjeya ecuana e'e jojo nei Eyacuiñajjiya huoojea'yo ojaya esohui huohuijji ojjaña eba, de. Jamajjeya esohui mi tehue mee cani jama ba'a: “Pabo quea pame nee, Eyacuiñajjiya huoojea'yo”.

³ E'e, ojjaña ba cani miquianaya Jesosaja epeeiji cuana poanaje ecuanaja esohui shajja'ajja majje. Edojjoshahua Pameya miquianaya Jesosa nijje jjapeequi meesahua ca'yonaje. Yahuajo nei Eyacuiñajjiya esohui mei beje biajje tehue majje ojjaña ba mee ca poa etiiquiana Moisesi oja huoojea'yo. Jjeya ca ca Eyacuiñajjiya Edojjoshahua Pameya miquianaya Jesosa Quito nijje jjapeequi meesahua ca'yonaje ecuea esohui miquiana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuijji.

⁴ Ecuana jaya eba Eyacuiñajjiya ecuana Jesosaja epeeiji quea ja'a nee po mee majje huoojea canaje miquiana huasijke esohui huohuiya.

⁵ Jamajjeya jama jjashahuabaquiani ecuana ba'a: —¿A'a ecuana quea pame nee poanijo, quea sapa ja'a poanijo esohui huohuije quea ja'a nee? Chojja. Eyacuiñajjiya ecuana esohui huohui meesahua canijo ca ca quea ja'a nee poani ecuanaja esohui —jamaya ecuana jjashahuabaquiani.

⁶ E'e, Eyacuiñajjiya ecuana huohui meesahua cani ojaya esohui eyacua Jesosajo. Etiiquianaja esohui jayojja jama pojjeama ecuanajaya esohui; eyacua. Ecuanajaya etiiquiana Moisesija esohui yahuajo nei etehue'yojo ojjaña ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caje'yo tii tii; Eyacuiñajji nijje eba'e'yojji pojjeama.

Jjeya ca ca ecuaaya huohuaña jama ba'a: — Mano'yajo, Edojjoshahua Pameya Jesosaja epeeiji cuana ba'e tiitii mee caje'yo —ecuana poani.

⁷ E'e, yahuajo nei Moisesiya ojjaña jama tehueme aca poa ba'a: “Eseyá quea mimishi poajo, Eyacuiñajjiya quea nee nee po mee caje'yo tii tii cuaquijo”. Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijji jayojja poa esohui quea pamejojo. Jamajjeya Isaeni cuaa Moisesija ecojja ba jjima aca poa quea siyo nee neejojo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa.

⁸ ¿Ajea esohui quea pame nee nee po tiitiije? ¿A'a Moisesija pojja'a? ¿A'a Edojjoshahua Pameja? Edojjoshahua Pameya eseaya ba'e tiitii mee canijo quea pame nee; e'e, Moisesija iye bame bame.

⁹ ¡Bacue! Moisesija esohui etehue'yo quea pame pishana ojjaña cuaa ba canaje jama ba'a: Eseyá quea mimishi poajo, Eyacuiñajjiya quea nee nee po mee caje'yo tii tii.

Edojjoshahua Pameya ca ca eseaya Eyacuiñajjiya epeeiji mimishi'ama po mee cani. Quea pame nee nee Edojjoshahua Pameya eseaya acani.

10 Yahuajo nei Moisesija etehue'yojo ojjaña jjashahuabaquinaje ojaya esohui etehue'yo quea pameya poa. Jjeya pea ejjashahuabaquijji yani. Jjeya ca ca esohui quea pame nee eba'e tiitijji ecuanajaya eba. Quea pame nee nee esohui eyacua poani.

11 E'e, yahuajo nei ojaya esohui etehue'yo quea pame neejo Moisesi ma esohui tehue majje quea cojja jiji poa, quea cojja jiji nee epo tiitijji pojjeama. Jjeya ca ca esohui eyacua quea ja'a capo tiitii'yahua. E'e, ecuana ba'e tiitii mee caje'yo quea pame nee nee epo tiitijji.

12 E'e, ecuanajaya eba Edojjoshahua Pameya ecuana ba'e tiitii mee caje'yo. Jamajoya ma esohui eyacua huohui tiitiiaña bicho'ama.

13 Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoqui'ya poa Isaeni cuana mete'ama epojji. Ecuanaya ca ca Moisesi jama pojjeama. Esohui eyacua eba'e tiitijji nahue ajja; huohui majamajaña ojjañaja ebajji.

14 E'e, yahuajo Isaeni cuaa Moisesija esohui etehue'yo shajja'ajja majje jamatii eba'e tiitii'yojji ba meemee ajja poa. Esohui eyacua onajaya quea quehua poa. Ejjacojja dodoqui jayojja oya poa. Jesosa Quitoja epeejji nei poanijo ca ca ohuaya esohui eyacua eba'e tiitii'yojji ba mee cani.

15 Jjeya nei pea'ai Isaeni cuaa Moisesija esohui etehue'yo shajja'ajja canijo esohui eyacua eba'e tiitii'yojji onajaya quea quehua.

16 Jamatii ojjaña joya Jesosa Quito nijje jjapeequiani ohuaya esohui eyacua ba mee caje'yo quea ja'a nee.

¹⁷ E'e, jamaya poaje Edojoshahua Pameya, Jesosa Quitohua pea'ai eseya ba mee caje quea ja'a nee Eyacuiñajiji ejashahuabaquijji. Ma ba majje esohui eyacua esejaya quea ja'a nee poaje. Jamajjeya Jesosa nijje jjapeequi'yajo, ohuaya eseya ba'e tiitii mee caje'yo onijje, Moisesija esohui amajje pojjeama.

¹⁸ Jesosaja epeejji cuana poanijo eseya jjacojja paaqui jjima jayojja jama. E'e, ojjaña ba meeje Eyacuiñajjiya eseya Jesosa jayojja jama atiitii meesahua cani. Jamajjeya Edojoshahua Pameya esea eyamijo aniya quea ja'a nee jjashahuabaqui mee cani. Jesosa jayojjaya popoqui mee cani eseya.

4

Pabohua esohui huohui cani quea ja'a nee eba'e meesahuajji

¹ Eyacuiñajji ecuana nijje quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huoo-jea ca'yonaje ojaya esohui eyacua Jesosajo huohuiya. Jamajjeya ecuaaya quea ja'a nee huohuiaña yeno'ama, mete'ama.

² E'e, ma esohui Jesosajo huohuiañajo quea mimishi ba'e'yo ajja. Quea mimishi jjashahuabaqui ajja pea'ai. Edasiajji cuana pojjeama. Ecuanaja esohui Jesosajo e'e jojo nei poani. Jamaya Eyacuiñajji eba. Jamajjeya ecuanaja esohui e'e jojo nei poanijo, ojjaña jjashahuabaquije jama ba'a: —E'e, jiquio esohui huohuijji cuanaja esohui e'e jojo nei poanijo,

eyaya shajja'ajjaje. Oya cuana edasiaiji cuana pojjeama.

³ Ecuaaya Eyacuiñajji esohui e'e nei huohui tiitiiaña. Jamatii beca cuanaja, Edosiquiana nijje jjapeequianija Jesosaja esohui quea quehua. Oya cuana aje oe quea nee nee poaje'yo tii tii.

⁴ Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii dejja mimishi cuana onijje jjapeequi sa po ajja. Oya cuana aje oe cojjama' jayojja, de. Jamajjeya Edosiquiana neiya, ma ojjaña dasiajji poaniya oya cuana dasia cani esohui quea pame nee nee Jesosajo ojaya ebajji pojjeama.

⁵ Joya ecuaaya sohuihuohuiaña miquianajaya e bihuiajji pojjeama. Chojja. Ecuaaya huohuiaña jama ba'a: —Ecuana miquiana ba meesahua-jji poani. Jesosa Quito ca ca Emeshi Mese nei poani. Jamajjeya ¡Jesosa bihuiacue miquianaaya! —ecuanaya miquiana niñeshe'ajji poani.

⁶ ¡Bacue! Yahuajo nei meshi pana jjimahuajo Eyacuiñajji jama huohuime aca poa ba'a: "Quea misi, ¡quea ja'a nee oe po'yocue!" aca poa; jjaja'aqui mee ca'ya poa. Jjeya ohuaya tiiya eseaya Jesosajo jjashahuabaqui meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pea'ai.

*Ona Jesosa nijje jjapee meesahuaquiañajo ba'e
tiitiije'yo*

⁷ Eyacuiñajjiya ecuana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epeejji quea ca'a nee acanijo, ojjañaa ba cani jama ba'a: —E'e de, Eyacuiñajjiya quea ca'a neeya Jesosaja epeejji cuana quea ca'a nee o jayojja jama po mee cani. Ojjaña huasijke esohui quea pame nee huohui meesahua cani.

⁸ Mimishi cuaa ecuana napa cani. Jamatii ecuana ejeabichajea'yoji pojjeama. Pea cuana quea mimishi poanijo, quea camaja tii ecuanaja eba'ejji. Jamatii quea yeno nee nee pojjeama ecuana poani.

⁹ Mimishi cuaa napa cani Jesosaja esohui ehuohui poaje jjejojo. Jamatii Eyacuiñajjiya ecuana ejeana'yoji pojjeama. Pea cuaa cuiajea cajo, jamatii ecuana mano'yo ajja.

¹⁰ Jesosa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuana acaje'yo pea'ai pojja'a Jesosa nijje jjapeequianijo. Jamajjeya ojjañaa jama acaje ba'a: —E'e jojo nei Jesosaa jiquio dejja cuana ojaya epeejji nei po tiitii mee cani. Mimishi cuaa napa cajje jamatii esohui huohui pajea jjima acani.

¹¹ E'e, pea cuaa ecuana napa majamaja cani Jesosa nijje jjapeequianijo. Ecuana quecua sa acani pea'ai. Jamatii ecuana quea ja'a nee po tiitiianijo, ojjañaa ba caje Jesosa ecuana jaahuanajji quea ja'a nee. Oya eshe, de.

¹² E'e, mimishi cuaa ecuana quea nee nee po mee cani esohui Jesosaja huohuiañajo. Jamatii

ecuanaja esohui shajja'ajja majje miquianaya Jesosaja epeejji poanaje. Jamajjeya ohuaya miquianajaya mimishi cuana cuijea'yo majje ba'e tiitii mee caje'yo.

¹³ Yahuajo Eyacuiñajjiya esohui huohuijjiya Dabiya huohui ca poa jama ba'a: "Ecuea eba e'e jojo nei Eyacuiñajji e jaahuanajji poani. Jamajjeya jamaya eyaya huohuiaña" Dabiya aca poa. Jjeya ecuana Dabi jayojja Eyacuiñajji nijje jjapeequiani. Ecuanaja eba e'e jojo nei Eyacuiñajjiya ecuana jaahuanana cani. Jamajjeya ecuaaya esohui huohui tiitiaña jamatii mimishi cuaa napa cani tiiya. Jama poani ba'a:

¹⁴ —Emeshi Mese nei Jesosa mano'yajo, Eyacuiñajjiya oya shequi mee ca'yonaje. Jamaya ecuana mano'yajo, e'e jojo nei Eyacuiñajjiya ecuana shequi mee caje'yo. Ohuaya ecuanaya, miquianaya pea'ai nequi tiitii mee caje'yo Jesosa nijje eyajo —ecuaaya aña.

¹⁵ E'e, quea camaja poani ecuana Jesosaja esohui huohuiañajo. Jamatii ecuanaja esohui ba majje miquianaya Jesosa nijje jjapeequinaje. Jamajjeya Eyacuiñajjiya miquianaya ba'e tiitii mee cani. Pea cuana quea huiso Jesosa nijje jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama ba'a: —Eyacuiñajji quea pame nee nee poani. Quea ca'a nee nee poani pea'ai —acaje ojjañaa.

¹⁶ Jamajjeya ecuaaya maya esohui Jesosajo huohui pajea'yo ajja. Chojja. Onaa napa caje ecuana quea nee nee poani. Edejja tii cuana jayojja jama ca'a'ama poaje. Jamatii Eyacuiñajjiya ecuanaja edojjoshahua cuana quea ja'a po tiitii mee cani.

¹⁷ Jjeya onaa napa cajje ecuana quea nee poani Jesosa nijje jjapeequianijo. Quea nee po tiitii'yo ajja. E'e, jjeya quea nee poani. Jamatii Jesosa nijje jjapeequianijo, quijje ohuaya ecuana ba'e tiitii mee caje'yo quea pame nee eyajo onijke. Quea nee popajeaje'yo. Jamaya quea pame nee nee.

¹⁸ Jjeya nei ecuaaya Jesosa ba jjima aña ecoj-jaa. Jamatii ecuana jjashahuabaquiani Jesosa nijje eyajo eba'e'yojji. Jiquio meshijo eba'ejji ecuana jjashahuabaqui ajja. Jiquiojo ba'e tiitii ajja. Eyajo Jesosa nijje ca ca oe ba'e tiitiije'yo.

5

Eba'ejji quea pame nee eyajo

¹ Ecuaaya jama baña ba'a: Eseyea mano'yajo Eyacuiñajjiya eyacua pana caje'yo esejaya eyami. Eyami eyacua ani tiitiije'yo eyajo. E'e, eseyea jiquio meshijo ba'yanijo ca'a'ama. Eyajo ba'e'yo majje quea ca'a nee eseyea poaje'yo tii tii.

² Eseyaya jjeya nei ishoaña eyami eyacua. Cuanya eseyea jiquio meshijo ba'yanijo quea nee nee poani. Jamajjeya jjashahuabaquiani jama ba'a: —Eya poqui sa poani eyahuasijje. Jomajo ecuea eyami eyacua poaje'yo.

³ Jesosa poe o'oyajo, jiquio eyami eyacua poaje. Jiquio ecua jjapipi eyacua poani jama jayojja esejaya eyami eyacua poaje'yo. E'e, eseyea jjashahuabaquiani eyami eyacuajo. Quea pame nee poaje.

⁴ Jiquio meshijo ba'yanijo eseyea quea nee nee poani. Quea camaja nee jiquiojo eba'ejji. Esejaya eyami ca'a'ama, jjapipi jjacocoqui jjima

jama. Jjacocoqui sa poani. E'e, eseya poqui sa poani eyahuasijje. Jomajo eyami eyacua sa poani. Jiquiojo manoje'yo. Eyacua po majje ca ca eseya ani tiitije'yo eyajo.

⁵ Eyacuiñajjiya eseya ba'e tiitii mee cani; esejaya eyami eyacua aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseya ba mee cani jama ba'a: E'e jojo nei Jesosaja epeeiji poanijo ohuaya ecuana eyami eyacua quia caje'yo; ani tiitii mee caje'yo onijje eyajo.

⁶⁻⁷ Jamajjeya jjashahuabaquiani jama ba'a: — E'e, Eyacuiñajjiya eseya ba'e tiitii mee caje'yo onijje. Eseyá jiquio meshijo ba'yanijo Jesosa cojja neijo ani ajja. Esejaya eyami eyacua po majje Jesosa nijje ani tiitije'yo. Jjeya Jesosa esejaya ecojjaja ba jjima; jjaba meequi ajja. Jamatii eseya jjashahuabaqui mee cani onijje enequi tiitii'yojji. Jiquio meshijo aquiana cuana quea huiso baña ecojja. Jamatii ma aquiana cuanajo jjashahuaba neineiqui ajja.

⁸ E'e jojo nei baña Eyacuiñajjiya eseya ba'e tiitii mee caje'yo. Jamajjeya mete'ama, quea bei nee poani. Poqui sa poani Jesosa nijje eba'e tiitii'yojji, Emeshi Mese nei nijje. Ishoaña esejaya eyami eyacua.

⁹ Jamajjeya jjeya nei eseya Jesosaja esohui jayojja jama atiitii sa poani jiquio meshijo ba'yanijo. Quijje pea'ai eyajo onijje ani tiitije'yo. Jamaya sa poani.

¹⁰ E'e, esefa eba jama ba'a: Jesosa Quitohua eyajo ojjaña huoojeajji poanijo ojjaña meshijo ba'ya poa nequi mee caje o cojja neijo. Ojjaña

quea mimishi poanaje ohuaya quea nee nee po tiitii mee caje'yo. Ojjaña quea pame poanaje ca ca quea bihui nee nee po tiitii mee caje'yo. Jamaya eseyaya baña.

Jesosaa ecuana sohuihuohui mee cani ona onijje ejjapeequijji

¹¹ E'e, Jesosaa, Emeshi Mese neiya ojjaña quea mimishi poani quea nee nee po mee caje'yo tii tii. Quea tecue nee nee poaje ojjaña quea mimishi poani nijje. Jamajjeya ecuaaya ojjaña dejja cuana huohuiaña jama ba'a: —¡Jesosaja epeeiji pocue! ¡Miquea mimishi cuana pajea'yocue!

Eyacuiñajjija eba ecuana ojaya epeeiji poani. Ecuana esohui e'e jojo nei poani, siajje pojjeama. Jamaya ojaya eba pea'ai.

Ecuana jjashahuabaquian i jama ba'a: —Ojjaña Conitojo ba'eja eba esohui e'e nei ecuaaya huohuiaña.

¹² Jamajjeya ecuana miquiana nijje jama po ajja ba'a: —¡Ecuana bihuiacue quea pame poanijo! —chojja, jamaya ecuana po ajja. Jiquio jama ecuana a sa poani ba'a: Ecuaaya huohui tiitiiña eyacua eba'e'yojji Jesosa nijje eyajo.

Jamajjeya miquianaaya esohui huohuijji nisho huohuicue quea ja'a nee jama ba'a: —Miquianaaya ca ca oe niñebaña Pabo, esohui huohuijji nei. Miya janobajjima nei mimianijo quea pame esohui huohuijji poso jjabaquian i. Jamatii quea ja'a ba'e ajja. ¡Jesosa Quitojo oe quea ja'a nee jjashahuabaquicue! ¡Quea pame a'yocue! —jamaya esohui huohuijji nisho acue.

¹³ Ecuanaja esohui quea pame Jesosajo, eba'e'yojji eyacuajo pea'ai shajja'ajja majje beca cuana siajje poani jama ba'a: —Pabo niñepoqui, de, ojaya epeejji cuana pea'ai niñepoqui —siajje poani.

Eyacuiñajji nijje chaco tiitiliañajo, onaaya ecuana niñepoqui poso acani. Jamatii ecuaaya chaco tiitiña Jesosaja esohui quea ja'a nee miquianajaya ebajji.

¹⁴ Jesosa Quito ecuanajaya quea jea nee poanijo esohui e'e nei huohuiaña. E'e jojo nei ojjaña mimishi acanijo mano tiitije'yo. Jesosa mano'yonaje ojjaña mimishi cuijea'yojji, ojjaña cuaqui yasijke epoquijji pojteamajo. Jamaya ecuanaja eba nei nei.

¹⁵ E'e, Jesosa mano'yonaje ojaya epeejjiya mimishi cuijea'yojji. Mano'yajo, Eyacuiñajjiya oya shequi mee ca o'oyanaje. Jamajjeya ¡ojaya esohui jayojjaya ca'a cahua! ¡Yahuajo ejjashahuabaquijji capajea ca'yahua!

¹⁶ Jesosaja epeejji cuana po jjimahua ecuana pea cuanajo jjashahuabaquinaje quea tai dejja mimishi jama. Jjeya, cho. Jjeya ecuanaja ejjashahuabaquijji pea cuanajo Jesosaja ejjashahuabaquijji jayojja jama quea ja'a nee poani. Ojaya epeejji cuana po jjimahua ecuana Jesosa Quitojo jjashahuabaquinaje quea tai dejja mimishi jama. Jjeya, cho.

¹⁷ Jamajjeya Jesosa Quito nijje jjapeequianijo, ohuaya eseaya pea jjashahuabaquime po mee cani. Esejaya ejjashahuabaquijji eyacua quea ja'a nee po mee cani. Jesosa Quito ba jjimahuajo ba'ya poa jayojja po'yo ajja. Jjeya eseaya pea

jjashahuabaqui'yome poani Jesosa jayojja.

¹⁸ Eyacuiñajjiya Jesosa Quito huoojea canaje eseo mano'yohua. Jesosa mano'yajo, Eyacuiñajji ese nijje quea quene po tiitii ajja. Ese nijje quea bei po'yo majje ohuaya eseya huoojea canaje ojjaña huasijje ojaya esohui huohuiya jama ba'a: —Eyacuiñajjiya Jesosa huoojea canaje eseja mimishijo mano'yohua. Jamajjeya Eyacuiñajji ese nijje quea quene po tiitii ajja. ¡Jesosa nijje jjapeequicue!

¹⁹ E'e, ohuaya Jesosa Quito huoojea canaje ojjañaja mimishijo mano'yohua. Jamajjeya Eyacuiñajji ojjaña ese nijje quea bei poani. Quea quene jjashahuaba tiitiiqui ajja esejaya mimishi cuanajo —jamaya Eyacuiñajjiya eseya huohui meesahua cani.

E'e, jjeya Eyacuiñajjiya ecuana huoojea canaje jama huohuime aa ba'a: —Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Ojaya epeejji cuana pocue!

²⁰ E'e, ecuana Jesosa Quitoja esohui huohuiji poani. Ohuaya ecuana huoojea canaje onijje chachohua. E'e, Eyacuiñajjiya ecuana huoojea canaje ojaya esohui huohuiya miquiana huasijje. Jamajjeya ecuaaya esohui huohuaña miquianaya Jesosaja epeejji epo meejji. Jama aña ba'a: — ¡Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Jesosaja epeejji pocue, Eyacuiñajjiya pea'ai! —ecuana poani.

²¹ Jesosa Quito quea pame po tiitiinaje mimishi'ama nei. Jamatii Eyacuiñajjiya jama acanaje ba'a: —Ojjañaja mimishi cuana Jesosa

Quitoja poaje. Jiquio ecua miquianaaya aquiana aboaña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa tiitii'yoji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: —Ojjaña Jesosa nijje jjapeequiani eyaya baña ecuea epeejji, shajjama' pojjeama —Eyacuiñajji poanaje.

6

¹ E'e, ecuaaya Eyacuiñajji nijjeya ojjaña huasi-jje esohui quea pame nee Jesosajo huohuiaña. Jamajjeya ecuaaya miquiana huohui neineiaña jama ba'a: —¡Eyacuiñajjiya esohui shajja'ajja majje jamaya pocue! ¡A'a shajjama' pojji! Shajjama' cuana eba'e meeji pojjeama eyajo Jesosa nijje.

² ¡Eyacuiñajjiya esohui shajja'ajjacue! Yahuajo nei nei ohuaya tehue mee ca poa jama ba'a: “Jjeya nei miquianaya enijje mimiani miquiana mimishi cuijea'yojji. Eyaya miquianaya shajja'ajjanaje. Enijje mimianijo, eyaya miquianaya ba'e tiitii meeje'yo pea'ai”.

Jamaya Eyacuiñajjiya esohui yahuajo nei etehue'yo poa.

¡Bacue oe! Jjeyahua nei Eyacuiñajji miquiana shajja'ajja sa poani. Jjeya nei ohuaya miquianaya ba'e tiitii mee sa acani ojaya epeejji nei nei epoji.

Pabo quea nee nee poanaje

³ Ecuaaya Jesosaja esohui jayojja jama atiiti-iaña quea ja'a nee. Jamajjeya ojjaña ecuana ba majje Jesosaja esohui shajja'ajja caje'yo. Jamaya ameemee ajja ba'a: —E'e de, Jesosaja epeejji cuana quea mimishi nee poani. Jamajjeya ecuana ojaya

epeejji po sa po ajja —jama siaje pomeya epojji pojjeama.

⁴ Chojja. Ecuana ba majje ojjañaa caba cahua ecuana Eyacuiñajijo quea pame nee chacochacoani jamatii onaa napa caniya tii. Quea pame nee po tiitiiani. E'e, onaaya ecuana quea nee po mee cani, ecuana niñeba cani, Jesosa nijje jjapeequianijo eba'ejji quea camaja poani pea cuana quea mimishi poanijo.

⁵ Maaya ecuana cuia majamaja canaje, jeanobiajea majamaja canaje, ecuana nijje quea quene nee po majje quea huiso jjachichaquinaje. Ecuana cojja neijo nequi majje janobajjima mimipanajajinaje. Ecuana quea camaja chacochaco majje cahui jjima tii aninaje. Quea shoe po majamajanaje pea'ai. Jamatii ecuanaaya esohui quea pame Jesosajo huohui majamajaña, huea'ama nei nei ecuana poani.

⁶ Mimishi'ama nei nei ba'yani pea'ai. E'e, ecuana chacochacoani Jesosajo quea pame nee. Quea huiso esohui Jesosaja ecuanaja eba quea ja'a nee. Ecuana quenequene cuaji ajja pea cuana nijje. Quea bei poani. Dejja tai'ama poani. Edojjoshahua Pameya quea pame nee ameesahua cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjañaa ba cani ecuana Jesosa Quitoja echacojji quea ja'a nee.

⁷ Ecuanaja esohui e'e jojo nei poani. Eyacuiñajjiya huohui meesahua canijo ecuanaja esohui quea ja'a nee poani. Eyacuiñajjiya emimishi cuijea'yo jjejojo ecuana ba'yani quea ja'a. Jamajjeya ecuaaya eshahuaja epeejji cuana mimicuiajeanobiajeaña esohui e'e nei mimi majje. Ey-

acuiñajjiya ameesahua canijo esohui e'e nei mimi-anii tii.

⁸ Cuanaya eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesosaja esohui huohuijijojo.

Pea cuana ca ca jama poani ba'a: —Paboja esohui quea ja'a nee.

Beca cuana ca jama poani ba'a: —Chojja, Paboja esohui shajja'ajja sa po ajja ca iña.

Pea cuaa ca jama saja'ame acani ba'a: —Pabo Eyacuiñajjiya esohui huohuijji quea ja'a nee.

—Chojja, Pabo esohui huohuijji nisho. Oya siajje pojji —jama eya niñebameya acani cuaa.

⁹ —Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñeba majje eya cuia canaje cuaa. Jamatii Eyacuiñajjiya jaahuana canaje jjejojo eya mano'yo jjima.

¹⁰ Quea huiso epreejji nisho poanajejo, eya quea yeno poani. Jamatii Eyacuiñajjiya eya quea bihui nee po mee cani. Eya aema' poanaje pea'ai. Jamatii ecuea esohui shajja'ajja majje quea huiso Jesosaja epreejji poani, quea pame ba'yani. E'e, Jesosaja epreejji poanijo eseaya quea aquiana huiso nee nee jayojja. Jiquio meshijo ba'yanijo ca ca eya e' aquiana mese pojjeama. Jamatii Jesosaja epreejji poanijo ecuea quea huiso aquiana yani eyajo.

¹¹ Ecuea epreejji cuana Conitojo ba'e, eyaya ojjaña ecuea ejjashahuabaquijji huohuiaña quea

ja'a nee miquiana huasijke miquianaya ecuea quea jea nee poanijo.

¹² E'e, miquiana nijje jjapee neineiquiani, miquiana quea jea nee nee poanijo. Miquianaya ca ca enijke jjapee neineiqui sa po'yo ajja.

¹³ Jamajjeya epeejji cuana, ecuea esohui miquiana huasijke jama ba'a: —¡Jiquio ecua miya ecuea quea jea nee nee jamaya oe eya acue miquiaaya! ¡Enijke jjapee neineiquicue! —eyá poani.

¡Dejja mimishi nijje a'a jjapee neineiquiji!

¹⁴ Miquianaya Jesosaja epeejji cuana poanijo ja'a nequijji Jesosaja epeejji pojjeama cuana nijje! ¡Ojaya epeejji cuana jayojja a'a pojji! Jesosaja ejjashahuabaquijji Edosiquiana neiya ejjashahuabaquijji jama pojjeama. Pea oya, de. Jesosaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesosaja epeejji Edosiquianaja epeejji nijje. Pea oya, de.

¹⁵ Jesosa Quitoja ejjashahuabaquijji quea pame nee nee. Edosiquianaja ca ca quea tai. Pea ojaya, de. Jesosa Quitoja epeejji cuanaja ejjashahuabaquijji quea pame. Ojaya epeejji pojjeama cuanaja ejjashahuabaquijji ca ca quea tai. Pea ojaya, de.

¹⁶ Eyacuiñajjija equi yasijke Jesosaja epeejji cuana dobiquiani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesosaja epeejji cuana huasijke Eyacuiñajji dobiquinaje. Jamajjeya eshahuaja epeejji cuana nijje jjapeequi meemee ajja.

Yahuajo nei Eyacuiñajjiya esohui huohui mee ca poa ojaya epeejji cuana huasijke jama ba'a:

“Miquianaya ecuea huapa pojjeama cuana poanijo, eya miquiana huasijke dobiqiani, miquiana nijje jjapee tiitiiquiani pea'ai. E'e, eya oe nei miquea Eyacuiñajji. Miquianaya jaahuanatiaña pea'ai. Miquiana ecuea epeejji cuana poani”.

Jamaya pea esohui etehue'yo poa pea'ai ba'a:

¹⁷ “Jamajjeya ¡ecuea epeejji pojjeama cuana nijje a'a jjapee tiitiiquijji! ¡Enijke nei oe jjapee tiitiiquicue! ¡A'a quea mimishi pojji! Jamajjeya eyaya miquianaya ba'e meeje'yo enijke.

¹⁸ Cuanaya eya miquianajaya Chii nei poaje. Miquianaya ecuea ebacua piona cuana, ecuea ebacua ejja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuajo nei huohui ca poa.

7

¹ Ecuea epeejji cuana, ¡shajja'ajjacue mo! Eyacuiñajjiya jíquio esohui huohui canaje esejaya ebajji, ese jaahuanajji poaniya. Jamajjeya ja'a quea mimishi ba'ejji; a'a quea mimishi jjashahuabaquijji pea'ai! Miquianajaya eba Eyacuiñajjiya ojjaña mimishi cuana quea nee nee po mee caje'yo tii tii. Jamajjeya ¡quea pame nee nee oe acue! ¡Eyacuiñajjiya ejjashahuabaquijji jama oe pocue! ¡Oya oe shajja'ajjacue!

Pabo quea bihui nee poanaje

² ¡Eya quea jea nee acue! Eyaya miquianaya quea pame nee a'yonaje. Ecuea esohui quea pame poanijojoya miquianaya quea pame nee nee po meeje'yo. E'e, miquianaya ecuea edasiajji pojjeama.

³ Eyaya jiquio esohui huohuiaña miquiana tecueajji pojjeama. Chojja. Yahuajo eyaya huohuinaje jama ba'a: —Miquianaya ecuea quea jea nee nee. Jamajjeya eya miquiana nijje ba'e majje quea bihui nee poaje. Cuanaya miquiana nijje nequi majje eya manoje'yo pojja'a. Jamatii, jamaya quea pame nee miquianaya ecuea quea jea nee poanijo.

⁴ Ecuea eba miquiaaya ecuea esohui etehue'yo jayojja jama aje'yo. Jamajjeya eyaya miquianajo jama huohuiaña ba'a: —Jesosaja epeejji cuana Conitojo ba'eya ecuea esohui etehue'yo jayojja jama acani —eya poani.

E'e, miquianajo eya quea bihui nee poani. Pea cuaa eya quea nee nee po mee cani Jesosa nijje jjapeequianijo. Jamatii eya quea bihui nee nee poani miquiana quea pame nee nee poanijojo.

⁵ Ecuea epeejji Conitojo ba'e, eyaya miquianaya huohuije ecuea eba'ejjijo pea meshijo. Eya Masenonia meshijo nequi pea cuaa napa majamaja canaje, niñeba majamaja canaje pea'ai. Jamajjeya eya quea ajjajja poanaje.

⁶ Jamatii Eyacuiñajjiya ojaya epeejji quea yeno nee nee poajo jaahuana cani. Jamajjeya ohuaya Tito huoojea ca'yonaje e quea bihui po mee'yojji.

⁷ E'e, Tito ba majje eya quea bihui nee poanaje. Ohuaya miquianajo huohui canaje quea pame jama ba'a: —Pabo, Jesosaja epeejji cuana Conitojo

ba'eya eya, Tito, jaahuana ca'yonaje quea pame nee. Miya ojjañaja quea jea nee poani, Pabo. Yahuajo onaaya esohui huohuijji nisho shajja'ajja canaje. Jamajjeya miya quea yeno poanajejo, miquea epeejji cuana pea'ai quea yeno poanaje. Miya ona nijje quea bei po mee o'oya sa acani cuaa —jamaya Tito poanaje.

Jamajjeya miquianaya ejo jjashahuabaquian-ijo, eya queabihui nee poani.

⁸ Yahuajo eyaya pea tehue'ya poa quea tecue. Ma esohuijuya miquianaya quea yeno poanaje. Quea camaja nee ma esohui etehuejji poanaje, miquiana tecueajji. Jamatii, ma etehue'yojo miquianaya quea yeno po tiitii ajja.

⁹ E'e, ma esohui etehue'yo ba majje miquianaya quea yeno poanaje. Quea yeno po majje miquianajaya mimishi pajea'yonaje. Esohui huohuijji nishoja esohui siajje shajja'ajja pajea'yonaje pea'ai, miquianaaya. Jamajjeya miquianajo eya quea bihui nee poani. E'e, quea yeno poanajejo, Eyacuiñajjiya miquianaya ba'e meesahua ca'yonaje quea pame nee. Jamaya quea pame nee miquianajo.

¹⁰ Dejja cuana quea mimishi poani Eyacuiñajjiya quea yeno po mee cani oja mimishi pajea'yojjii. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeejji cuana quea yeno poani mimishi amajje. Jamatii Eyacuiñajjiya oya cuana quea nee nee po tiitii mee caje'yo mimishi pajea sa po'yo ajjajojo.

¹¹ E'e, Eyacuiñajjiya miquianaya quea yeno po mee ca'yonaje. Quea yeno po majje miquianaya quea pame nee poani. Shajjama' cuana, mimishi

cuana miquiana nijje nequi. Ojaya mimishi cuana cajaa aña miquianaaya. Oya miquiana-jaya epee'yojji pojjeama; miquianaya onaya jay-ojja jama po ajja. Quea quene poanaje pea'ai esohui huohuijji nisho cuana nijje e siajje ajjijojo. Miquianajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi cuana a sa po'yo ajja. Cuanaya enijje jjapee neineiqui sa poani, quea bei. Miquianajaya Eyacuiñajji quea boti nee poanijo esohui shajja'ajja o'oya sa poani. E'e, miquianaya quea ja'a jjashahuabaquianijo, ecuea eba miquianaya mimishi poani nijje jjapeequi'yo ajja. Jjabahuejjaqui meesahuaje'yo Jesosa nijje ejjapeequijji. Jamaya quea pame nee.

¹² Jamajoya eyaya yahuajo esohui tehue majje miquiana huasijke huoojeanaje. Eyaya maya esohui tehuename miquiana jjashahuabaqui meeiji jama ba'a: —E'e de, Pabo Eyacuiñajjiya huoojea'yo esohui huohuijji. Oya ecuanaja quea jea nee. ¡Oja tehue jayojja jama ejja'aqui o quea bihui pojji! — jamaya miquianaya jjashahuabaquinaje.

Maya esohui eyaya tehuename dejja quea mimishi cuana tecueajji. Ma dejja cuanaja mimishijo pea cuana quea yeno poanaje. Eyaya ma esohui tehuename dejja quea yeno ani cuana yeno'ama po mee'yojji pea'ai.

¹³ Jamajjeya ecuea etehue'yo ba majje miquianaya quea ja'a jjashahuabaqui o'oyani. Jamajjeya eya quea bihui nee poani.

Yahuajo miquiana nijje mimi jjimahuajo Tito quea yeno jjashahuabaquinaje jama ba'a: —

Jesosaja epeejji cuana Conitojo ba'e quea mimishi
jea nee nee.

Jamatii miquiana nijje mimi majje Tito quea
bihui nee poanaje. Jamajjeya eya quea bi-
hui nee poanaje Titoja esohui shajja'ajja majje
miquianajo ohua huohui cajje.

¹⁴ Yahuajo eyaya oya huohuinaje jama ba'a: —
Tito, Jesosaja epeejji cuana Conitojo ba'e mini-
jje jjapeequije'yo. Miquea esohui shajja'ajja caje
pea'ai —eyaya anaje.

E'e, ecuea esohui Tito nijje jayojja jama a'yonaje
miquianaaya. Jamajjeya miquianaaya quea pame
anaje; eya bicho'ama miquianajo.

¹⁵ Miquiana huasijke poqui jjimahuaja
miquianaya Titoja quea boti nee pishana. Miquiana que poqui majje miquianaya ojaya
quea boti nee nee. Oya quea bihui nee nee
pea'ai. E'e, miquianajo jama poani ba'a: —E'e,
Jesosaja epeejji cuaa Conitojo ba'eya ecuea esohui
shajja'ajja canaje quea jaji nee. Ohuaya ojjañaa
ecuea esohui shajja'ajja neinei canaje eya etecuea
poajeya jjejojo. Ecuea esohui jayojja jama a sa
poanaje —Tito poanaje.

¹⁶ E'e, ecuea eba miquianaya ecuea esohui jay-
ojja jama poaje. Jamajjeya eya, Pabo, miquianajo
quea bihui nee poani, de.

8

jJesosaja epeejji cuana ba'e meesahuacue!

¹ Ecuea epeejji cuana Conitojo ba'e, jjeya eyaya
miquianaya huohuije Jesosaja epeejji cuana
Masenonia meshijo ba'ejo. Eyacuiñajjiya oya

cuana ejjeshejji quia meesahua canaje Jesosaja epeejji cuana Jodea meshijo ba'e yasijje equiajji.

² E'e jojo nei quea camaja nee nee onajaya eba'ejji, Masenonia meshijo ba'eja. Aema' cuana poanaje. Jamatii onaaya ejjeshejji quia canaje queabihui nee Jesosaja pea epeejji aema' nei cuana ba'e meesahuajji. Queabihui nee nee poanijo quea huiso quia sa poanaje.

³ Ecuea eba oya cuana aema' poanaje. Jamatii ejjeshejji quia canaje. Quia majje quea camaja, aema' nei poanaje. Ecuea oya cuana huohui jjima ejjeshejji quiajji, pea cuana ba'e meesahuajji. Chojja. Jamatii quia canaje.

⁴ Oya cuana enijje mimi majamajanaje jama ba'a: —¡Ecuana ejjeshejji dojocue! ¡Quiacue Jesosaja epeejji cuana Jodea meshijo ba'e yasijje ona ba'e meesahuajji! Jamaya ecuana a sa neinei poani—poanaje Jesosaja epeejji cuana Masenonia meshijo ba'e.

⁵ Eya jjashahuabaquinaje jama ba'a: —Onaaya ejjeshejji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajji esohui jayojja jama poaje'yo. Cuanaya ojjaña ecuanajaya aquiana ojaya poani—jamaya oya cuana poanaje—. ¡Ecuana huohuicue Eyacuiñajji ejjashahuabaquijji! Miquea esohui jayojja jama ecuana poaje'yo—jamaya Jesosaja epeejji cuaa Masenonia meshijo ba'eya huohui canaje.

⁶ E'e, quea ja'a nee acanaje. Jamajjeya eya Tito nijje miminaje jama ba'a: —Tito, ¡Jesosaja epeejji cuana Conitojo ba'e yasijje poqui o'oyacue!

Yahuajo miya ona nijje miminaje ejjeshejji Jesusaja pea epeeiji cuana huasijke equiajji, ona ba'e meesahuajji. Jamatii ejjeshejji huoojea jjima. Jamajjeya ijjeya ona nijje mimi o'oyacue ejjeshejji equiajjiyo! ijama acue ba'a: "Jesusaja epeeiji ba'e meesahuañajo miquianaya quea pame nee poani Jesusajo" jamaya acue, Tito! —eyaya Tito huoojeaña ma esohui huohuiya.

⁷ E'e epeeiji cuana, miquianaya quea pame nee poani jama ba'a: Jesusaja esohui jayojja jama poani. Miquianajaya esohui Jesusajo quea pame pea'ai. Miquianajaya eba quea huiso esohui Jesusaja. E'e jojo nei quea ja'a nee jjashahuabaquiani pea'ai. Eya miquianajaya quea jea nee poani pea'ai. Jamatii jjeya Eyacuiñajjiya miquianaya ejjeshejji quia meesahua cani Jesusaja epeeiji Jenosanenajo ba'e yasijke ona ba'e meesahuajji. Jamaya quea pame pea'ai. Onaa napa cajje oya cuana aema' nei. Napa huicha'a huicha'a canaje cuaa Jesusaja epeeiji poanijojo.

⁸ Ecuea Tito miquiana que huoojea jjima ejjeshejji quia meeya. Chojja. Jesusaja pea epeeiji cuaa jamatii ejjeshejji quia canaje quea bihui nee. ¿A'a miquianaya onaya jayojja po sa poani pea'ai? ¿A'a miquianaaya quea pame nee aje pea'ai?

⁹ ijashahuabaquicue Jesosaa miquianaya quea pame nee nee acanaje! Jama ba'a: Jesosa ba jjimahuajo miquianaya aema' jayojja poanaje. Jamatii ohuaya, Jesosa Quitohua, esejaya Emeshi Mese neiya miquianaya ba'e tiitii mee caje'yo oni-jje eyajo quea ja'a nee nee. Dejja cuana huasijke poe jjimahua Jesosa ba'e'yonaje eyajo quea ja'a

nee nee. Meshi yasijje poe majje ca ca dejja cuana jayojjaya poanaje, aema' pea'ai. Jamaya oya poanaje miquiana ba'e tiitii mee'yojji eyajo.

¹⁰ Jamajjeya miquianaya ejjeshejji quiajjijo eya jama poani ba'a: Oe shequiaja yahuajo miquianaya ebionei jjashahuabaquinaje ejjeshejji aema huasijje equiajji. Pea cuana jjashahuabaqui jjimahuajo miquianaya quia sa poanaje.

¹¹ E'e, miquianaya ejjeshejji quia sa poanaje. Jamajjeya ijjeya miquianajaya ejjashahuabaquijji yahuajo jayojja jama acue! ¡Miquianajaya aquiana quea huiso yanijo quea huiso quiacue pea'ai! ¡A'a quea bejjo nahue pojji!

¹² Aquiana quia sa poanijo, Eyacuiñajji quea bihui nee poani e'aquiana mese nijje. Ojaya Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajjija eba ese-jaya aquiana quea huiso pojja'a, oe pojji pojja'a. ¿A'a aquiana cuana miquianajaya quea nahue?

¹³ Onaa napa cajje aema' nei nei ani quea camaja. Oya cuana miquianaa aquiana quiajje aema' nei epo'yojji pojjeama. Ma aema huasijje quea huiso aquiana quia majje miquianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuabaquiani jama ba'a: —Oe Jesosaja epeejji aquiana cuana quea huiso poajo epeejji aema huasijje iye huiso quia majje chama' aema' poaje.

Jamaya eyaya amee sa aña.

¹⁴ Jjeya nei miquianajaya aquiana quea huiso. ¡Jesasaja epeejji aema huasijje quiacue! Quia majje oya cuana aema' pojjeama poaje. Quea ja'a ba'eje'yo. Quijje miquianaya aema' poajo, onajaya aquiana yanijo quia caje'yo miquiana huasijje pojja'a. E'e, ojjañaja aquiana cuana pea cuanaja aquiana cuana oya huiosoajja poaje.

¹⁵ E'e, esohui etehue'yo yahuajo nei jayojjaya jama poani ba'a:

“Beca eque mese cuaa oe pojji bobí chicha canaje.

Pea eque mese cuaa bobí quea huioso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobí oya huiosoajjaya poanaje”.

Pabohua Tito huoojea caje Conito cuiñajji yasijje

¹⁶ Eyaya Eyacuiñajji bihuiaña jama ba'a: — Eyacuiñajji, miyaya Tito jjashahuabaqui meenaje quea ja'a nee miquea epeejji cuanajo, Conitojo ba'ejo. Jamajjeya oya e jayojjaya onajo jjashahuabaquiani. Conitojo ba'e cuana quea ja'a nee ba'e mee sa acani Jesosajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

¹⁷ E'e epeejji cuana, ecuea esohui etehue'yo miquiana huasijje ejjeshejji aema huasijje equiajji ba majje Tito quea bihui nee poanaje. Miquiana huasijje poqui sa poani ecuea esohui etehue'yo huohuiya. Eyaya oya huoojea jjima. Chojja, oya jamatii poqui sa poani miquiana que.

¹⁸ Tito nijje eyaya pea dejja huoojeaña, Jesosaja epeejji pea'ai. Maya poquinaje ojjaña Jesosaja

epeejji cuana huasijke esohui Jesosajo huohuiya. Shajja'ajja majje oijaña Jesosaja epreejji cuaa huohui canaje jama ba'a: —Maaya Jesosajo quea pame nee esohui huohui cani —acanaje cuaa.

¹⁹ Jesosaja epreejji cuaa pea cuiñajji cuanajo ba'eya jiquio epreejji babaca canaje enijje epoquijji Jenosanena huasijke ejjeshejji aema huasijke dojosahuaa. Jamaya eya ejjeshejji dojo sa neinei poani Jesosaja epreejji aema' poani yasijke ona ba'e meesahuajji. Jamajoya pea cuana Jesosajo jjashahuabaquije jama ba'a: —E'e de, Jesosaa ojaya epreejji cuana quea ja'a nee ameesahua cani. Jesosa ca ca oe quea pame nee poani —poaje cuana.

²⁰ Ma epreejji enijje poquianiya ohuaya ba caje eyaya e'e jojo nei ma ejjeshejji aema huasijke quiaña. Jamajjeya pea cuana ejo siajje epojji pojjeama jama ba'a: —Pabo ejjeshejji siijji pojja'a — pea cuana jamaya epojji pojjeama.

²¹ E'e, eya jjashahuabaquiani jama ba'a: — Eyaya quea pame nee ejjeshejji dojoje. Jamajjeya oijañaa ba caje eya siipojji pojjeama. Jesosaja eba eyaya quea ja'a nee aña.

²² Tito nijje eyaya beca dejja huoojeaña miquiana baa. Maya ecuea eba. Oya pea'ai quea ja'a nee po tiitiiani. Jesosajo chaco cani. Jjeya maya miquiana nijje quea ja'a nee nequije. Miquianajo jjashahuabaquiani jama ba'a: — Jesosaja epreejji cuana Conitojo ba'e quea pame nee poani. Quea bejjo nahue pojjeama, shajjama' pojjeama pea'ai poani.

²³ E'e pojja'a pea cuaa huohui'ajja caje: —¿A'ya cuae Tito?

Jamajjeya ¡oya cuana huohuicue jama ba'a: — Titohua Pabo nijjeya esohui quea pame nee Jesosaja huohui cani. Ohuaya Pabo miquiana nijje chaco meesahua cani —huohuicue!

Pea dejaa ma beca epeejji cuanajo huohui'ajja cajo, jama acajo ba'a: —¿Aya acuae oya cuana huoojea canaje? —acajo, ¡oya cuana huohuicue jama ba'a: —Jesosaja epeejji cuaa beca epeejji huoojea canaje miquiana huasijke, miquiana Jesosajo ba meesahuaa. Ohuaya Jesosajo huohui cani quea pame nee pea'ai —acue!

²⁴ Jamajjeya ¡jiquio Jesosaja epeejji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jesosaja epeejji cuaa ba caje miquianaya Jesosaja epeejji quea ja'a nee poani pea'ai. Jamajjeya ojjañaa ba caje ecuanaja esohui quea pame miquianajo e'e nei poani pea'ai.

9

Ejjeshejji Jesosaja epeejji cuana huasijke equiajji

¹ Eyaya miquiana huasijke esohui etehue maja-majajji pojjeama Jesosaja pea epeejji aema' ba'e meesahuajji.

² Chojja. Ecuea eba miquianaya pea cuana ba'e meesahua sa neinei poani. Jamajjeya eyaya Jesosaja epeejji cuana Masenonia meshijo ba'e huohuinaje jama ba'a: —Jesosaja epeejji cuaa Acaya meshijo ba'eya ejjeshejji chicha sa acani aema huasijke equiajji. Jamaya ohuaya acanaje oe shequiaja yahuajo —jamaya eyaya pea cuana huohuinaje.

Ma esohui miquianajaya shajja'ajja majje pea epeejji cuana ejjeshejji chicha sa poanaje pea'ai Jesosaja epeejji aema huasijje equiajji.

³ Jjeya eyaya beca cuana, Jesosaja epeejji cuana huoojeaña miquiana huasijje. Jamajjeya jecuea esohui ma ecua eyaya yahuajo huohuinaje jayojjaya oe acue! E'e, ma beca epeejji cuaa miquianaya ojee iyaa caje ejjeshejji echichajji, aema' nei Jodea meshijo ba'e yasijje equiajji. Jamajjeya miquianajaya ejjeshejji equiajji apoa poaje pea cuana poe jjimahuajo.

⁴ E'e, Jesosaja epeejji cuana Maseronia meshijo ba'e miquiana huasijje poe'yajo, miquianajaya ejjeshejji aema huasijje equiajji apoa ajjimajo quea bicho nee nee poaje miquianaya. Eya pea'ai quea bicho poaje miquianaaya ecuea esohui jama ajjimajo. Quea bicho nee eya poaje.

⁵ Jamajjeya eyaya Jesosaja epeejji beca cuana huoojeaña pea epeejji cuana miquiana que poe jjimahuajo. Ohuaya miquea ejjeshejji aema huasijje equiajji chicha meesahua caje. ¡Miquianajaya esohui yahuajo jayojjaya jama acue! Jamajjeya miquianajaya ejjeshejji equiajji quea huiso poaje, miquianajaya ejjashahuabiquijji yahuajo jayojjaya. Jamajjeya miquianaaya queabihui nee quiaje'yo.

¡A'a quea dejja tai pojji; a'a quea nishehui pojji!

⁶ ¡Jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miquianajaya ejjeshejji poaje. Jjeya quea dejja tai poanijo, quea nishehui poanijo pea'ai oe pojji aema huasijje quiajo, quijje

Eyacuiñajjiya oe pojji quia caje'yo miquiana huasijje. Jjeya quea huiso quiañajo ca ca, dejja tai'ama poanijo ca ca quijje Eyacuiñajjiya quea huiso quia caje'yo miquiana huasijje.

⁷ Jamajjeya ijashahuaba neineiquicue ache huiso miquianaya quia sa poani! ¡Quea bihui nee quiacue! E'e, jjamatii miquianajaya ejjashahuabaquijji jayojja jama quiacue! Eyacuiñajjiya quea jea nee ojaya epeejji cuana. Ejjeshejji quea bihui nee quia canijo, dejja tai'ama poanijo pea'ai Eyacuiñajji quea bihui nee poani.

⁸ E'e, Eyacuiñajjiya aquiana cuana quea huiso nee nee yani. Jamajjeya miquianajaya quea huiso ejjeshejji aema huasijje quia majje, jamatii ohuaya miquianajaya aquiana quea huiso po titii mee caje'yo. Miquianaya aema' nei epoji pojjeama. Chojja. Eyacuiñajjiya miquianaya jaahuana cani.

⁹ Yahuajo nei nei esohui etehue'yo jama poa ba'a:

“Ojjaña joya ejjeshejji quea huiso quia tiitii canaje aema' ba'e meesahuajji quea pame nee poanaje. Jamajjeya jjeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”.

Jamaya yahuajo nei nei esohui etehue'yo poa.

¹⁰ Eyacuiñajjiya eso' quia cani ojjaña huasijje quejo equecuajji. Ohuaya bobí quia cani ojjaña bobiajji pea'ai. Jamajjeya ohuaya miquiana huasijje eso', bobí pea'ai quia majje, ¡miquianaaya aquiana cuana quiacue pea cuana huasijje! Jamaya quea pame nee.

¹¹ E'e, Eyacuiñajjiya miquiana huasijje aquiana mi ba'e meeiji quia caje'yo. Jamajjeya miquianaaya pea huasijje aquiana o ba'e meeiji quia poquia tiitiije. Jamajoya miquianajaya aquiana quea huiso equia'yo aema huasijje eya quiajje onaaya huohui caje jama ba'a: — Eyacuiñajji ecuana jaahuanajji quea pame nee nee poani. Ohuaya Conitojo ba'e cuana ecuana que quia meeshahua canaje quea huiso, ma ecua Pabohua huohui canaje jama acanaje —poaje queabihui nee.

¹² Ma aquiana cuana miquianaaya Jesosaja epeeiji aema' cuana huasijje quiañajo, quea ja'a nee ba'e meeaña. Cuanaya ma aquiana quea huiso quiañajo, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecuana nijje —poaje.

¹³ E'e, miquianaya dejja tai'ama poanijo, aquiana quiañajo quea huiso ba meeaña miquiana Jesosaja epeeiji quea ja'a nee poani. Jamajjeya oya cuana mimije jama ba'a: —Eyacuiñajji, miyaya miquea epeeiji cuana quea ja'a nee po meeaña. Miyaya oya cuana quea huiso aquiana quianaje. Jamajjeya miquea pea epeeiji cuana huasijje aquiana quea huiso huoojea canaje ona ba'e meesahuajji. E'e, miquea epeeiji cuaa Conitojo ba'eya huohui cani oya cuana Jesosa Quitoja epeeiji cuana poani. Ecuana eba onajaya esohui e'e jojo nei poani miquea esohui jayojja jama oya cuana poanijo —jamaya pea cuaa huohui caje miquianajo.

¹⁴ Jamajjeya miquianaya ojaya quea jea poanijo, Eyacuiñajji nijje mimi majje jama poaje

miquianajo ba'a: —Eyacuiñajji, miyaya quea huiso aquiana quianaje ona que. Majoya Jesosaja epeejji cuana Conitojo ba'e quea huiso aquiana quia meesahuanaje ecuana que. Ecuana quea jea ameesahuanaje. ¡Quea pame nee poanijo, oya cuana jaahuanacue! —jamaya onaya mimije Eyacuiñajji nijje.

¹⁵ Eyacuiñajji esejo jjashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya mique Bacua Ejja huoojeanaje ecuana jaahuanaa. Quea pame nee nee poanaje miya — jamaya Eyacuiñajji bihuiaña eyaya.

Mahuiso ecuea esohui ejjeshejji equiajjijo.

10

Pabo esohui huohuijji nei nei

¹⁻² Jjeya eyaya, Pabohua pea esohui tehueaña. Eyacuiñajjiya eya huoojea canaje miquiana sohuohuohuiya. Jamajjeya ¡shajja'ajjacue mo! Jerososa Quito ese nijje quea bei poani. Jamajjeya eseaya ojaya epeejji poanijo, eya miquiana nijje mimi neineiani jama ba'a: —Beca siajjepojji cuana miquiana nijje mimiani ejo jama ba'a: “Pabo aje oe ecuana nijje nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pea'ai poani; poe majje, cho” oya siajje poani.

¡A'a maya siajjepojji cuana shajja'ajjajji! ¡A'a o jayojja jama mimijji! E niñebajji, eyaya miquiana tecueaje poe majje. Eya quea tecue poaje beca cuana nijje ejo quea tai jjashahuabaquianijo. Oya

cuana aje oe jjashahuabaquiani jama ba'a: — Pabo Eyacuiñajjija huojea'yo jayojja jama po ajja. Ohuaya ojaya ejjashahuabaquijji jayojja jama poani, Jesosaja ejjashahuabaquijji jayojja jama pojjeama —ejo siajje poani beca cuana.

³ Chojja de. Eseya Jesosaja epeeiji cuana jiquio meshijo ba'yanijo ojjaña quea mimishi mimicuia-jeanobiajea sa seya aña. Jamatii eshahuaja epeeiji cuana jayojja jama jjashahuabaqui ajja eseya.

⁴ Eshahuaja epeeiji cuaa onajaya ej-jashahuabaquijji quea tai jayojja jama acani. Eya, chojja. Ecuea ejjashahuabaquijji jo pojjeama eyaya eshahuaja epeeiji cuana mimicuiajeanobiajeaña. Eyacuiñajjiya ca ca eya ojaya ejjashahuabaquijji ameesahua cani. Jamajjeya ohuaya eya ojjaña joya quea mimishi nee poani mimicuiajeanobiajea meesahua cani.

⁵ Ecuea eba Eyacuiñajjija esohui quea ja'a nee. Jamajjeya beca cuana Eyacuiñajjija esohui niñeba canijo, eyaya oya cuana mete mee majje mimicuiajeanobiajeaje; jjaniñebapajeaque meeje'yo. Cuanaya beca cuana Eyacuiñajji quea tai jjashahuabaquiani mimicuiajeanobiajeaje'yo pea'ai. E'e, Eyacuiñajjiya eya ameesahua canijo, beca cuana quea tai jjashahuabaquiani eyaya Jesosa Quitoja esohui jayojja jama ameeje'yo.

⁶ ¡Miquianaaya Jesosaja esohui jayojja jama acue! ¡Ojaya epeeiji nei pocue! Majoya eyaya shajjama' cuana miquiana nijje nequi, ojjaña quea mimishi poani pea'ai tecueaje.

⁷ Beca cuaa miquiana nijje nequiya e cojja ba majje huohui cani jama ba'a: —Pabo ca'a'ama

pojja'a. Sohui sajea'ama. Eyacuiñajija huoo-jea'yo pojjeama, sohuihuohui sahua jjima pojja'a —jamaya poani e ba pishana majje.

Jamatii ecuea ejjashahuabaquijji Jesosajo ona-jaya eba pojjeama. Oya nei Jesosa Quitoja epeejji poso jjabaquiani. Cajjashahuabaquiahua jama ba'a: —Pabo pea'ai Jesosa Quitoja epeejji poani e'e jojo nei. E'e, Pabo ecuana jayojjaya jama poani —cajjashahuabaquiahua.

⁸ E'e, eya bicho'ama miquiana nijje emimiji. Jama mimi majamajame eya poani ba'a: —Eya iña iquo Eyacuiñajija esohui huohuijji. Ohuaya eya huoojea canaje miquiana huasijje oja sohui huohuiya, miquiana ojaya epeejji quea ja'a nee po meeya. Eya miquiana jjabahuejjaquianijo quea yeno po mee sa po'yo ajja. Caja sa po'yo ajja pea'ai —jamaya eya miquiana nijje mimiani.

⁹ Eyaya miquianaya jjabahuejjaquianijo, quea ajjajja po mee sa po'yo ajja.

¹⁰ Beca siajjepoji cuana miquiana nijje nequi ejo siajje poani jama ba'a: —Paboja esohui etehue'yo quea sohui ja'a poani. Emeshi meseja esohui etehue'yo quea ja'a jayojja jama poani pea'ai. Jamatii oya ecuana nijje nequianijo ca'a'ama poani. Ojaya esohui quea ja'a pojjeama pea'ai —jamaya siajje poani beca cuana.

¹¹ Ma siajjepoji cuana cajjabahuejjaquiahua jiquo jama ba'a: Miquiana huasijje poqui majje jiquo ecuea esohui etehue'yo jayojja jama eyaya aje'yo miquiana huasijje, e'e jojo nei.

¹² E'e, beca siajjepoji, esohui huohuijji nisho cuana miquiana nijje nequi mimiani jama ba'a: —

Ecuana ca ca quea pame nee nee poani. ¡Ecuana oe shajja'ajjacue! —jama siajje pomeya poani.

Eya ca ca jjashahuabaqui sa po ajja jama ba'a: —Pea cuaa aje oe quea tai acani. E jayojja pojjeama onaya. Eyaya ca ca oe quea pame nee aña —chojja, jamaya eya, Pabo po sa po'yo ajja.

Ma siajjepoiji, esohui huohuijji nisho cuana aje oe jama poani tii ba'a: —Ecuana ja ejjashahuabaquijji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojjeama jjashahuabaquiani, de.

¹³ Eyacuiñajiya ca ca eya huoojea canaje miquiana huasijke ojaya esohui huohuiya. Jamajjeya ojaya esohui eyaya huohuaña bicho'ama miquiana huasijke. Ojjaña huasijke ca ca huohui jjima.

¹⁴ E'e, miquiana huasijke esohui Jesosa Quitojo eyaya huohuinaje. ¡Bacue! Eyacuiñajiya eya huoojea canaje miquiana huasijke esohui huohuiya. Ojaya esohui huohuijji e'e jojo nei eya. Eyaya quea ja'a nee huohuaña. Jiquio ecue tehue'yojo eya bicho'ama.

¹⁵ Cuanaya miquianaya sohuihuohuañajo eya siajje po ajja jama ba'a: —Eya ee nei ojjaña huasijke esohui huohuijji nei quea ja'a nee. Onaya miquiana nijje chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jjashahuabaquiani jama ba'a: —Miquianaaya

Conitojo ba'eya Jesosa Quitoja esohui jayojjaya jama quea ja'a añajo eya pea cuiñajji cuana huasijje esohui huohui meesahuaje Jesosaja.

¹⁶ Jamajjeya miquianaya jamaya poajo eya poqui meeje pea meshi cuana huasijje esohui quea pame nee huohuiya Jesosajo, onaja esohui huohui jjima huasijje. Esohui huohujji pea meshi cuanajo enequijo eya ona nijje enequi tiitiiji pojjeama. Iña ca jja ca poquije, de, pea cuana huasijje Jesosaja esohui huohuiya.

¹⁷ E'e, yahuajo nei esohui etehue'yo jama poa ba'a:

“¡A'a jama huohujji ba'a: —Eyaya jamatii quea pame aña. Chojja, jamaya pojjeama. Jamaya huohuicue ba'a: —Eyacuiñajjiya eya quea pame nee ameesahua cani. Jamajjeya eyaya quea pame aña —jamaya acue!”

Yahuajo nei esohui etehue'yo jamaya poa.

¹⁸ Eyacuiñajji ojaya epeejji quea pame neejo mimiani jama ba'a: —Jiquio epeejjiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya ¡ecuea esohui shajja'ajjacue! —jamaya esohui huohujji nisho poani onajaya quea jea e'ajji. Jamaya ca ca Eyacuiñajjiya boti'ama.

11

Esohui huohujji nishojo Pabo quea yeno mimiani

¹ Dejja ma ohua acanajejo jjashahuaba tiitiiquianijo esho'i jama mimijajani, de. Jamatii

ma eya anajejo mimianijo, ja'a jja oe enijje quea quene pojji! ¡Shajja'ajja socue mo!

² E'e, miquianaya Eyacuiñajjija quea jea nee nee poanijo, ecuea quea jea nee nee poani pea'ai. E'e, eyaya miquianaya Jesosa nijje jjapee coo meesahuaquinaje. Jiquio ecua ejeajjiya ojaya ebacuase mimishi'ama nei huana mee sa acani jayojja jama eyaya miquianaya Jesosa nijje jjapee-qui mee sa aña quea boejea nee, eshahua nijje pojjeama.

³ Ecuea eba miquianaya Jesosaja epeejji e'e jojo nei po sa neinei poani. Jjeya ca ca eya quea mete jjashahuabaquiani miquianajo, esohui huohuijji nishohua miquianaya quea tai jjashahuabaqui mee ca chana'. Jiquio ecua Edosiquiana neiya ma ecua peyo jayojjaa Ema dasia ca poa jayojja jama esohui huohuijji nishohua miquianaya dasia ca chana'; Jesosa nijje jjapee pajea meequi ca chana'.

⁴ E'e de, miquianaaya aje oe ojjaña esohui huohuijji nisho shajja'ajjaña. Oya cuana Jesosajo siajje poani, Edojjoshahua Pamejo siajje poani pea'ai. Esohui quea pame Jesosajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'ajjaña so'o?

⁵ Oya cuana ca jja ca oe Eyacuiñajjija huoojea'yo esohui huohuijji e'e jojo nei poso nequiaa aña; eya ca jja nequiaa ca oe cajaa aña. Chojja, eya ca ca iña iquio e'e jojo nei Eyacuiñajjija huoojea'yo.

⁶ E'e pojja'a oya cuana mimiani quea bishaa nee. Jamatii esohui quea pame Jesosaja ecuea eba nei nei. Jamaya miquianajaya eba. E'e, eyaya ma esohui huohui neineinaje ojjaña cuiñajji cuana huasijke.

⁷ Eyaya Eyacuiñajjija esohui quea pame Jesusaja huohuinaje miquiana huasijje sosema'. Eyaya ecuea eba'ejji jjeshenaje pea'ai ecue chaco sosejje. Miquea echacojji jayojja jama poanaje eya. Jamaya miquianaya Eyacuiñajjija esohui ba meesahuanaje. ¿A'a jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'yo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

⁸ ¡Bacue! Miquiana huasijje esohui huohuiañajo, Jesosaja epjeejji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miquianaya ca ca oe Eyacuiñajjija esohui sha-jja'ajja majje jamatii sosequia jjima.

⁹ E'e, Jesosaja epjeejji cuaa Masenoniajo ba'eya poe majje ecuea eba'ejji ye canaje. Yahuajo miquiana nijje ba'eya eyaya miquianajaya bobi ijji jjima: —¡Che mo oe esohui huohui sosejje! —ajjima ecuea miquianaya. Jamaya eyaya sosema' esohui huohui poquia tiitije quijje pea'ai.

Jamajjeya miquianajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miquianajaya.

¹⁰ Chojja. Jamajjeya ojjaña cuaa Acaya meshijo ba'eya ba caje eyaya esohui huohuinaje miquiana huasijje sosema'. Jesosa Quitohua ba cani eya e'e jojo nei mimiani.

¹¹ Jamaya eyaya huohuiaña miquiana ecuea quea jea nee nee poanijo. Jamaya Eyacuiñajjija eba.

¹² E'e, eyaya Jesosajo huohui tiitiije miquiana huasijje sosema'. Jamajjeya esohui huohuijji nishohua jama huohuime yajji pojjeama ba'a: –Ecuana Pabo jayojja chacochacoani –jamaya e'ajji pojjeama onajaya.

Esohui huohuijji nisho nequiaa sosequianaje esohui huohui cani sosejje.

¹³ Oya cuana ca ca oma Eyacuiñajjija huoojea'yo nisho poani, Eyacuiñajjija huoojea'yo pojjeama. Miquianaya dasia cani; Jesosaja huoojea'yo esohui huohuijji poso nequiaa aña.

¹⁴ E'e de, Edosiquiana nei Satanasa jama oya cuana poani. Ohuaya, Satanasaa ojjaña dasia cani; Jesosaja esohuidojiji quea pame nee poso acani cuaa.

¹⁵ Jamajjeya ojaya echacojji cuaa miquianaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa aña, de. ¡Poe o'oya majje Jesosaa oya cuana quea nee nee po mee caje'yo tii tii!

Pabo Jesosaja huoojea'yo poanijo quea nee poa

¹⁶ Jamajjeya eyaya miquianaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso aña, jamatii eya che shajja'ajja socue! Ma eya Jesosajo anajejo mimije so'o esho'i jama, onajaya quea jea e'ajji nisho.

¹⁷ Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso.

¹⁸ Jamatii quea huiso esohui huohuijji nisho esho'i jama ojaya huapa pojteamajo, ma ohua

acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho mimije.

¹⁹ Miquianaya aje oe jjashahuabaquiani jama ba'a: —Ojjaña ecuea eba. Eya ca ca iña jjadasia meequi ajja esohui huohuijji nisho cuana — jjashahuabaquiani.

Jamajjeya shajja'ajjaña joya esho'i jama joya ohua acanajejo mimiani pea'ai.

²⁰ E'e, ma esohui huohuijji nishohua miya chaco mee cani sosema', minijje ba'yani sosema', miquea aquiana mesena'yo sa acani, miya tanacula cani, cojja cuiapojojea cani pea'ai quea bicho epo meeiji. Jamatii miquianaaya aje oe oya cuana shajja'ajjaña, de.

²¹ ¿Apiojji acuae jja oe shajja'ajjaña? Ecuea ca ca jamaya ajjima. Jamajojoya ¿a'a eya ca'a'ama poso nequiaa aña, de? ¿A'a ma esohui huohuijji nisho cuana esho'i jayojja jama mimiani onaja quea jea e'ajji? E'e. Jamajjeya eya jamaya mimije pea'ai.

²² Esohui huohuijji nisho jama poani ba'a: — Ecuanaya jja iquo Emeo dejja cuana, Emeo esohui mimiani.

¡Dee! Eya pea'ai Emeo dejja, Emeo esohui mimiani.

—Ecuanaya Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuanaya etiiquiana Amajama bajjani —ma esohui huohuijji nisho poani.

Amajama ecuea etiiquiana pea'ai, de.

²³ —Ecuanaya jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nijje. Esohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuohui poaje jjejojo. Oya cuana, cho. Jodio etii cuaa eya cuia majamaja canaje Jesosaja esohui eya ehuohui poaje jjejojo. Ma esohui huohuijji nisho pea cuanaja cuia neinei jjima. Eya beshahua nei mano'yonaje; quea huiso mano huicha'a huicha'a'ajja'yonaje.

²⁴ E'e, ojjañaa ba canijo, Jodio etii cuaa eya quea huiso cuiasejja neinei'ajja canaje, 39 cuiasejjame acanaje, de, huaca jee ejepashajjajaa. Cuiasejja majamaja canaje, me oeje huisome cuiasejjame acanaje; pea meshijo cuia, pea meshi cuanajo cuia ca iña acanaje cuaa, de. Beshahua nei ca iña mano'yonaje mo, de.

²⁵ Jodio cuaa eya cuiasejja canaje acui sisiya, pea beca peejjima cuiasejjame acanaje pea'ai. Jaja canaje pea'ai meiya eya esohui ehuohui poaje jjejojo. Beshahua nei eya hui'ime poanaje, pea beca peejjima hui'ime poanaje. E'e de, bishe ai cuana jaanobiquinaje bae ai yasijke. Jamajjeya oe mecajje, oe pojjajo pea'ai eya bae aijo huepee biajje jjeejjee ba'e'yonaje.

²⁶ Cuanaya eya poqui huicha'a huicha'anaje pea cuiñajji cuana huasijke esohui huohuiya. Poquije beshahua nei eya mano'yonaje yohuajo ba'a: cuei quea cuejipashi neijo, siipojji cuanajo, Jodio cuanajo, Jodio pojjeama cuanajo pea'ai. Cuiñajji quea quemojo, ebiojo pea'ai dejja mimishi cuaa napa cajje eya beshahua nei mano'yonaje. Bae aijo

beshahua nei hui'i'yonaje pea'ai. Jesosaja epeeiji nishohua cuia cajje beshahua nei eya poquijeyo'yonaje pea'ai.

²⁷ Eyaya chaco neineinaje; cahui jjima poanaje pea'ai. Quea camajajo hueahuea'yonaje. Quea mano poanaje. Quea shoe poanaje. Quea naba taja nee nee poanaje. Bobimajo mano'ajja'yonaje. Eya quea huoe nei nei poanaje, daqui mooma' poanaje pea'ai.

²⁸ E'e, quea camaja ecuea eba'ejji. Cuanaya ojjaña pojajjo eya jjashahuaba majamajaquiani ojjaña Jesosaja epeeiji cuana jaahuanajji.

²⁹ Jamajjeya Jesosaja epeeiji nei cuana quea mete, ca'a'ama poanijo, eya quea yeno nee nee jjashahuabaquiani. Oya cuana quea mimishi poajo, mimishi pajea mee sa neineiaña eyaya. Jamaya eya poanaje.

³⁰ Esohui huohuijji nishohua miqianaya dasia canijo, eya camimi majamajaquiahu ecuea eba'ejjijo. Jjeya ca ca eyaya miqianaya huohuije pea esohui. Ma ba majje miqianaaya baje eya quea mete, dejja ca'a'ama jayojja jama poani.

³¹ Eyacuiñajji esejaya Emeshi Mese nei Jesosaja Chii. ¡Oya cabihuia tiitii cahua! Ojaya eba eya e'e jojo nei mimiani jama ba'a: Yahuajo Aneta emeshi mese poa Damasico cuiñajjijo. Ohuaya ojaya echacosahuajji cuana huoojea canaje e sa'ajja'yohua ojjaña ejiojijje, ba'yo majje e jeanobiajeajji.

³² Jamatii eya ojaya iña jjima, de. Eya Damasicojo nequi quehua poquinaje mecajje.

³³ E'e, Jesosaja epeeiji cuaa mei jiyojo nequiya equi huejjajje eya jjepai aijo jjabioquiajo, jeaoquea ca'yonaje cuaa jjonojo.

12

*Jesosaa Pabo jjacahuibaqui mee canaje ojaya
eba'ejji eyajo*

¹ Eya esho'i jama ma eya añajo mimi majamajani miquiana sohui huohuijji nisho eshajja'ajja poaje jjejojo. Jjeya ca ca eyaya miquianaya huohuije pea esohui, ma Jesosaa eya jjacahuibaqui mee canaje huohuije.

² Yahuajo nei quea shequiaja huiso, 14 shequiajame yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajjija ca ca oe eba.

³ E'e, eya pojja'a eshe ba mee ca poa. Jjacahuibaqui mee ca pojja'a mo poa. Eyacuiñajjija ca ca oe eba. Ecuea ca ca ba jjima.

⁴ Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya eba'ejji Quea Pame Nee bajjani yasijje, Panaiso bajjani yasijje. Jomajo eyaya shajja'ajjanaje esohui quea bame nee nee. Maya eyaya miquianaya huohui meemee ajja, yajja huohuime yajji jojoya. E'e, Jesosa eyajo ba'e enijje miminaje.

⁵ Jamatii eya ma esohuijo mimi huicha'a huicha'a ajja esho'i jama. Chojja. Eyaya miya ba meeje eya quea ca'a nee nee pojjeama. E'e jojo nei Jesosa enijje miminaje eyajo.

⁶ Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo nei. Miquiana nijje ba'eya eyaya chaco neineinaje miquianaaya banaje. Shajja'ajjanaje

ecuea esohui Jesosaja esohui huohuiañajo. Jamajjeya ejo jjashahuabaquiani e'e jojo nei miquianaya. Jamajjeya ma eya anajejo ehuohui majajji pojjeama esho'i jama, de, miquiana ejo jama ehuohui poaje jjejojo ba'a: —Pabo ca ca quea pame nee nee Jesosaja epeeiji quea ca'a tii tii —miquianaaya ehuohui poaje jjejojo.

Chojja, eya jamaya pojjeama.

⁷ Jamajjeya Jesosaa eya ojaya eba'ejji quea pame nee nee eyajo ba mee majje Eyacuiñajjiya eya quea nee po mee canaje emanomeejjiyo pojja'a. Jamajoya eya quea ca'a tii tii ejjashahuabaquijji pojjeama. Jiquio ecua Edosiquiana neija Satanasaja huoojea e cuiajji jayojja jama jiquio emanomeejji pojja'aa eya quea nee nee po tiitii mee cani.

⁸ Eya Jesosa nijje miminaje pea beca peejiima mimime. Jama poanaje ba'a: —Jesosa Quito, eya quea nee nee nequi. ¡Che mo oe nee'ama po meecue! —eya mimime poanaje.

⁹ Jamatii Jesosaa eya saja'a canaje jama ba'a: —Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee —acanaje.

Jamajoya eya ca'a'ama poanijo quea bihui nee poani. E'e, ecuea eba Jesosaa quea ca'a nee nee poaniya eya quea ja'a nee ojo chaco meesahua cani.

¹⁰ Jamajjeya eya quea nee nee poanijo, ecuea eba'ejji quea camaja poanijo pea'ai jamatii eya quea bihui nee poani. Pea cuua eya napa canijo, mimijajianijo pea'ai, jamatii quea bihui poani. Jesosaja esohui huohuijjijojo, jamaya dejja

mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesosaa eya quea ca'a nee po mee cani.

Pabo Jesosaja epeejji cuana Conitojo ba'ejo quea yeno poanaje

11 Eya esho'i jama ma eya anajejo mimi ma-jamajaje miquiana esohui huohuijji nisho esha-jja'ajja poaje jjejojo. Oya cuana aje oe Eyacuiñajjija huoojea'yo esohui huohuijji poso jjabaquiani. Eya ca ca iña e'e jojo nei Eyacuiñajjija huoojea'yo. Miquianaaya ca jja ca oe eya banaje Jesosajo cha-cochaco aninaje. Jamatii ejo huohui jjima jama ba'a: —Pabo e'e jojo nei Jesosaja huoojea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'ejjijo camim-quiahua esho'i jama, de.

12 E'e, eya miquiana nijje nequi Jesosaa eya atiitii mee canaje quea huiso ma dejjaajjima acani amee canaje miquianajaya ebajji. Jamajoya miquea eba eya Jesosaja huoojea'yo esohui huohuijji.

13 ¿A'a eyaya miquianaya quea pame pishana anaje, Jesosaja epeejji cuana pea cuiñajjijo ba'e quea pame anaje pojja'a? Chojja. Ohuaya e ba'e meeiji quia canaje. Maya eyaya jjeshenaje. Miquianajaya quia jjima. Jamatii ecuea bobijo huohui'ajja jjima. E'e pojja'a eyaya miquianaya ehuohui'ajjanaje ese jama ba'a: —¡Jesosaja pea epeejji jama sosequiameya mo che acue esohui huohuiaña sosejje! —e'anaje ese. Jamatii jamaya mimi jjima eya.

14 Yahuajo eya miquiana baa poquinaje beca poquime. Jjeya eya apoa. Poquije o'oya miquiana baa. Poqui majje eyaya eba'e meejjijo mimimimi ajja poaje. Chojja. Eya miquianajaya ejjeshejji sa po ajja. Miquianaya ca ca eya sa poani ecuea epeejji pojji. Jiquio ecua esho'i cuaa oja chii, ojaya enaese pea'ai bobia ajja jayojja jama eyaya miquea bobi sa ajja. Jamajjeya eya mique chii jayojja jama poanijo eya mi jaahuanajji poani. Miquianaya ca ca e jaahuanajji pojjeama.

15 Jamajjeya eyaya miquianaya Jesosajo ba meesahuaje sosema'. Jamajjeya e'e pojja'a eya aema' poaje. Cuanaya eyaya quea huiso chacoje miquiana esohui ba meesahuajji. Eya pojja'a hueahueaje miquianaya jaahuanajo. Jamatii. Ecuea miquianaya quea jea nee nee. ¿Apiojji acuae eya miquianajaya quea jea pishana, miquianaya ecuea quea jea nee nee poanijo?

16 Miquianajaya eba eya miquiana nijje nequi camaja'ama miquianajo poa. Chojja. Miquianajaya bobi ijzia jjima ecuea. Jamatii beca cuana aje ejo siajje poani jama ba'a: —Pabo siajjepojji. Ecuana dasia ca'yonaje —siajje oya cuana poani.

17 Chojja de, ecuea miquianaya dasia jjima. Esohui huohuijjija ma eya huoojeanajeja miquianaya dasia jjima pea'ai.

18 Eyaya Tito huoojeanaje jama ba'a: —¡Poquicue miya Conito huasijje esohui huohuiya Jesosajo! ¡Jesosaja epeejji oe dojocue minijje! —poanaje eya.

¿A'a Titohua miquianaya dasia canaje? Chojja. Ohuaya eyaya jayojjaya acanaje. Miquianaya ojaya quea jea nee pea'ai ecuea jayojjaya.

19 ¿A'a cuae miquianaya ecuea etehuejo jama jjashahuabaquiani pojja'a ba'a: —Pabohua aje pojja'a jja oe huohui cani oya e'e jojo nei Jesosaja huoojea'yo esohui huohuijji. Ecuana Jesosaja huoojea'yo nisho poani —a'a jamaya miquianaya jjashahuaba taiquiani?

¡Bacue oe! Eyacuiñajjija eba eya Jesosaja esohui jayojja jama e'e jojo nei huohuiaña. Epeeiji cuana, miquianaya ecuea quea jea nee. Jamajjeya eyaya ojjaña aña miquiana Jesosa nijje quea ja'a nee ejjapeequi meesahuajji.

20 Jjeya eya poquije miquiana baa. Miquianajo quea yeno jjashahuabaquiani jama ba'a: — ¡Dee! E'e pojja'a quea mimishi poani o'oya: Jjamimicuajea nobiajeaquiani, onaja aquiana jea ba cani, quea quene nee nee poani, quea aquiana nahue poani, quea nishehui poani, mimijajiani, pea cuanajo maimaiani, oya jjeshe sa pojji pea'ai jjejojo mimiani, quea shajjaquijjo, shajjama' poani pea'ai pojja'a —jamaya eya jjashahuabaquiani miquianajo, Conitojo ba'e cuanajo.

Miquianaya jamaya poajo eya quea yeno nee nee poaje. ¿A'a miquianaya quea yeno poaje miquianajaya mimishijo eya tecueajje?

21 E'e, miquiana quea mimishi poani ba majje eya quea tecue nee nee po chana'. Eya quea yeno nee, quea bicho poaje miquianajo. E'e pojja'a eya pajje miquiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miquianaya poanijo, eya quea yeno nee nee poaje ba majje.

13

¹ Yahuajo eya miquiana huasijke poquinaje becanejjiji pea'ai poquime poanaje. Jjeya eya poquije o'oya miquiana baa. Jamajjeya ¡bacue! Eyacuiñajjiya esohui yahuajo etehue'yo jama poa ba'a:

“Oe dejja peajo maimaiani ja'a shajja'ajjajji! ¡Becaa, pea beca peejjima oya jayojja huohui cajo, shajja'ajjacue!”

Jamaya tehue ca poa yahuajo nei.

² Jamajjeya jjeya eya miquiana huasijke poquije o'oya pea beca peejjima poquime epojji. Yahuajo miquiana nijje nequiya eyaya huohuinaje jama ba'a: —Ojjaña joya quea mimishi po tiitiiani, joya jjeya nei quea mimishi poani pea'ai eyaya tecueaja neineije poe o'oya majje —jamaya eyaya jjeya miquianaya huohui o'oyaña.

³ E'e, Jesosa Quitohua eya huoojea canaje miquiana huasijke ojaya esohui huohuiya. Ohuaya eya huoojea cani miquiana jjabahuejjaqui meeiji pea'ai. Joya miquiana nijje ba'e quea mimishi poani tii tii quea nee nee po mee caje'yo, ohuaya.

⁴ ¡Bacue! Dejja maseya Jesosa yahuajo nei acui ecueata'apeejo me cacajea cajje oya mano'yonaje. Jesosaja ca ca oya cuana jeabichajea jjima. Jamatii Eyacuiñajjiya quea ca'a nee nee poaniya Jesosa shequi mee ca o'oyanaje; quea ca'a nee nee ba'e tiitii mee cani. Yahuajo Jesosa ca'a'ama jayojja poa. Jamaya pea'ai eya ca'a'ama. Jamatii Jesosaa eya quea ja'a nee ojaya esohui huohui meesahua cani miquiana jjabahuejjaqui meeiji.

⁵ ¡Jjashahuabaquicue! ¿A'a Jesosaja esohui jayojja jama aña miquianaaya? Jesosa Quito miquiana nijje yani. ¿A'a miquianajaya ba jjima? Jesosa miquiana nijje pojjeama ca miquianaya ojaya epeeiji nishojo, de.

⁶ Eya ca ca iñia Jesosaja esohui huohuijji e'e jojo nei.

⁷ Jamajjeya eya Eyacuiñajji nijje mimiani miquiana mimishi pajea meesahuajji jama ba'a: —Eyacuiñajji, ¡miquea epeeiji cuana Conitojo ba'e mimishi'ama nei ba'e meesahuacue! —eya poani.

Eya jama jjashahuabaqui ajja ba'a: —Jesosaja epeeiji Conitojo ba'eca mimishi'ama ba'e ba majje pea cuaa eya bihuia caje, esohui huohuijji nei —jamaya eya po ajja.

Chojja, miquianaaya eya Eyacuiñajjija huoojea pojjeama poso aña; esohui huohuijji nisho poso aña; jamatii eya Eyacuiñajji nijje mimiani miquianaya ojaya epeeiji quea ja'a nee eba'e meesahuajji.

⁸ E'e, dejjaja Eyacuiñajjija esohui e'e nei ehuoojea pajea mee'yojji pojjeama ojjaña huasijke. Jamajjeya ecuea esohui e'e jojo nei, siajje pojjeama.

⁹ Jamajjeya miquianaya quea pame, mimishi'ama ba'e ba majje eya quea bihui nee poaje. Jamajjeya miquianaya etecueajji pojjeama, jamatii tecuea jjimajo eya Eyacuiñajjija huoojea'yo quea ja'a nee pojjeama poso aña. Jamajjeya eya Eyacuiñajji nijje mimiani miquianajo jama ba'a: —Eyacuiñajji, ¡miquea epeeiji cuana quea ja'a nee nee ba'e meesahuacue oe! —eya poani.

¹⁰ Jamajoya miquiana huasijke poqui jjimahuaa eyaya esohui tehueaña miquianajaya mimishi

epajea'yojji. E'e, eya Eyacuiñajjija huoojea'yo esohui huohuijji, miquiana jjabahuejjaqui meejjji. Eyacuiñajjija eya huoojea jjima miquiana janobajjima nei tecueajeaa quea yeno nee nee epo meejjji. Chojja, ohuaya eya huoojea canaje miquiana quea ja'a nee ba'e meesahuaa. Jamajjeya mi ba majje eyaya miquianaya etecueajeajji pojjeama mimishi'ama ba majje.

¹¹ Mahuiso ecuea esohui.

Esohui oe yejje nei etehue'yo

Ecuea epeejji cuana, ¡quea bihui nee pocue! ¡Shaja'ajjacue ecuea esohui! ¡Jama acue! ¡jjashahuaba neineiquicue quea ja'a nee nee eba'ejji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjija minijje ani tiitije'yo. Miquianaya ojaya quea jea nee nee. Oya ca ca oe quea bei nee nee.

¹² ¡Ojjaña Jesosaja epeejji nijje mimicue quea bei!

¹³ Ojjaña enijje nequiya miquianaya huohui'ajja cani jama ba'a: —¿Achajja acuae nequiana so'o? —onajaya ebajji.

¹⁴ ¡Esejaya Emeshi Mese nei Jesosa Quitohua miquianaya cajaahuana cahua! Eyacuiñajjija miquianaya quea jea nee. ¡Onijje caba'e tiitii mee cahua! ¡Edojjosahua Pame miquiana nijje cajapeequiahua tii tii!

Mahuiso. Eyaya, Pabohua jiquio esohui tehue'yonaje. Apoa.

Eyacuiñajjija Esohui New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files
dated 29 Jan 2022

88838088-e20d-51ca-8c91-69194f5ae678